

東
華
續
錄

臣朱壽朋敬編

臣章圭璋恭校

五月戊寅李鴻章電致總理各國事務衙門袁世凱三十夜電頃准韓政府文開案照敝邦全羅道所轄之泰仁古阜等縣民習兇悍性情險詭素稱難治近月來附串東學教匪聚眾萬餘人攻陷縣邑十數處今又北竄陷全州省治前經道練軍前往剿撫該匪竟敢拚死拒戰致陷軍敗挫失去器械多件似此兇頑久擾殊爲可慮況現距漢城僅四百數十里如任其再爲北竄恐畿輔騷動所損匪細而敝邦新練各軍現數僅可護衛都會且未經戰陣殊難用以殄除兇寇倘滋蔓日久其所以貽憂於中朝者尤多查壬午甲申敝邦兩次內亂咸賴中朝兵士代爲戡定茲擬援案請煩貴總理迅卽電懇北洋大臣酌遣數隊速來代剿並可使敝邦各兵將隨習軍務爲將來捍衛之計一俟悍匪挫殄卽請撤回自不敢續請留防致天兵久勞於外也並請貴總理妥速籌助以濟急迫至切盼待等語鴻已飭丁汝昌派海軍濟遠揚威二艦赴仁川漢城護商並調直隸提督葉志超率同太原鎮總兵聶士成選淮練勁旅一千五百名配齊軍裝分坐招商輪船先後進發一面電駐日本汪使知照日外部以符前約請代奏 上諭軍機大臣等

李鴻章電奏已悉此次朝鮮亂匪聚黨甚衆中朝派兵助剿地勢敵情均非素習必須謀出萬全務操必勝之勢不可意存輕視稍涉疏虞派出兵練千五百名是否足敷剿辦如須厚集兵力卽籌酌量添調尅期頒發以期一鼓蕩平用慰綏靖藩服至意○諭軍機大臣等著直隸提督葉志超酌帶精兵馳赴朝鮮之忠清道連平禍亂傳聞蕩無烽燧之警卽寄寓該國之各國官商人等亦可有恃無恐葉志超擒獲渠魁解散脅從後仍著尅日班師○龍鴻書奏道府爲監司大員有考察屬吏整頓地方之責必須資望較深洞曉公事者方足以資表率近來各省候補道府人員每省多者至百餘人少者亦數十人其中有由生監保捐者有由候補候選人員屢次保獎而得者並係初任人員未經歷練於地方公務不盡熟悉甚至年輕資淺執袴子弟殷富商人亦雜其中雖有到省一年期滿甄別之例而督撫率皆循例註考留省未聞劾去一人此等初任之員未嘗身親民社卽陟監司官階既覺太濫人望尤多未孚使之循資序補實缺何以表正屬員興利除弊查教職一項不得由附監報捐誠以職司訓迪故重其選況以道府人員位分較尊責任甚重尤當慎簡其人者乎臣愚以爲捐納道府必須內而曾任部員編檢外而曾任實缺同通州縣方可准其報捐其初任人員只應捐至同通而止各項保獎道府亦必須聲明曾任實缺及歷署各缺之員方准列保其未經到省候補人員概不得保以免補本班徑升道府如此予以限制則資望

既深庶能稱職而候補人員亦不至擁擠過甚流品混淆如實有才具可造有志効用者正不妨由州縣各官稽查閱歷亦並非阻其上進之階至各項捐例仍循舊章於捐輸亦復無礙可否請 旨飭部核議施行又奏捐納一途固為籌餉亦藉使淹滯之才及時効用惟班次太繁則易起捐生取巧之心尤易滋弊吏弊弊之漸即如現行事例分缺先用分缺間用兩項例銀不甚懸殊而分班序補可預揣得缺之遲速近來電報通行各省候補人員往往計算班次臨時報捐覬覦後緣易生流弊雖部定新章有六箇月後方准序補之例而工於取巧者仍可預為營謀臣愚以為此等班次於捐輸並無裨益而徒為巧宦多開門徑不如歸併名目以昭簡易是亦嚴抑躁競之一端也可否請 旨飭部核議酌量歸併 上諭覽鴻胥奏捐納保舉道府宜示限制並各項分缺先分缺間名目請飭酌量歸併各摺片著吏部議奏○予安徽桐城縣貢女張章氏旌表○己卯 上詣 大高殿祈雨○諭軍機大臣等御史端良奏寶泉寶源兩錢局近來鼓鑄廢弛均以鑄錢工本銀兩收買制錢等語現在有無此項弊端著戶部查明核實覆奏○庚辰雨○癸未命翰林院侍讀主事榮在兩書房行走○以纂輯平定陝甘新疆回匪方略三百二十卷平定雲南回匪方略五十卷平定貴州苗匪方略四十卷全書告成予世鐸等優敘有差○甲申 上詣 大高殿報謝○諭兵部吏部會奏核定拿獲會匪保獎章程請旨遵行一摺哥老會匪最為地方囂

愚各該員弁果能認真拿辦消患未萌原准從優保獎惟近來保獎之案漫無限制漸收實濫之弊自應分別辦理著照部議嗣後如有大股會匪抗拒官兵實係調兵剿滅仍准照異常勞績核獎其拿獲開堂立會首要各犯尤爲出力之員亦准照異常勞績請獎其餘訪拿餘匪無多之案仍照尋常勞績核獎至保獎員數應以獲匪多寡分別核定並出力等項專摺聲明一面將各員弁照章咨部立案以昭核實吏部另片奏請參酌例案嚴定禮匪勞績章一章程等因著依議行○乙酉戶部奏光緒十九年三月二十一日據兩江總督劉坤一奏重修兩淮鹽法志告成繕寫黃冊進呈一摺欽奉 硃批著戶部詳細核勘具奏欽此遵由內閣鈔出到部旋據該督咨送副本前來 臣等伏查兩淮鹽法自嘉慶時續修志書而後迄今已八十餘年其間所爲興利除弊守經達權者不可枚舉卽如道光時整頓兩淮綱鹽創行淮北票鹽繼行淮南票鹽咸豐時淮南就場徵課設廠收稅及湖廣江西各省借運鄰鹽同治以來規復淮南引地變通兩淮票鹽諸大端卷帙已屬繁夥采輯已爲不易而金陵揚州又復中更兵燹遺年故籍不無散佚迨至近歲焚燬政者始得彙集成書其事蓋尤難爲據該督前次所奏謂於近人文集故家藏案以及老商世第所鈔秘本皆采輯無遺則其難亦可想見顧鹽法志一書皆 累朝典章所繫與私家著述不同故案牘必典守在官而後可據職籍必通行於世而後可憑綴輯必不違乎勸戒之意論斷必不肯

乎是非之公而後可爲後來之法守臣等竊本斯義督飭司員悉心覆勘凡制詔奏議律令在嘉慶以前者則徵之舊志在嘉慶以後者則核之部檔或舊志未載部檔所無則恭稽歷朝聖訓旁考長蘆等處鹽法志與近時諸文集並行查軍機處及在京各衙門其鹽務各官稟詳批劄及各省督撫往復咨文未經達部者則參證於兩淮南北鹽法記略志略續略諸書而總以存部之例案其繁稱博引如歷代正史通典通考之類則從其所據者而是正之其闕說小序按語俾論顯爲抑揚褒貶之處則原其時勢取其事實而審定之統觀是書銓敘雖詳而未能盡書其中有措詞失當者有敘事抵牾者有舊案漏略者有采錄蕪雜者有款目舛誤者有字句訛脫者因就所見逐條指出分爲訂正補輯覆覈數商四類凡一千三百餘條繕成清冊擬由臣部咨交該督轉飭原纂之員妥速辦理另繕黃冊進呈恭候欽定仍造具副本送部備查以資考訂上諭戶部奏遵旨詳細覆勘重修兩淮鹽法志一摺鹽法志一書爲累朝典章所繫必應詳加考訂不得稍有舛誤方足以垂久遠前據劉坤一奏重修兩淮鹽法志告成繕寫黃冊進呈當交戶部詳細覆勘茲據奏稱統觀是書銓敘雖詳未能盡書將措詞失當及抵牾漏略蕪雜脫誤之處逐條指出分爲訂正補輯覆覈數商四類凡一千三百餘條繕成清冊卽著發交劉坤一督飭原纂之員按照該部所奏詳慎考核妥速辦理另繕黃冊呈覽餘依議○奎俊奏奴才此次出省覆勘崇明

縣海岸工程業經公出日期附片奏報在案奴才拜摺後隨即繞道鎮江前往工次查勘該縣孤懸海中聚沙成壤朔潮汐漲靡常與內地海塘之有老土依附者情形迥別溯自元代設治至前明萬歷年間沙岸屢坍城凡五徙現在東南一帶海岸波濤衝溢日刷日深中洪暗沙淤漲逐漸高寬以致大溜回激城垣逼近岌岌可危堵築保護實爲萬不可緩之工惟是地當大海風潮衝激形勢日有變遷施工用料均難預必飭據督辦工程江蘇候補道劉麒祥督率縣委紳董悉心籌議測量原擬設立敵水壩處所目下水深至四十餘尺岸址又復坍卸數丈十數丈不等與上年縣委各員原勘情形不同亟應設法變通趕緊興工辦理海上工程雖無實在把握然關繫城垣民命必須竭盡人力籌策萬全奴才惟有隨時會商督臣督飭相機堵築總期欸不虛糜功歸實際以資保衛但冀功成之後傍岸沙土繼長增高則岸脚益臻穩固庶無意外之虞報聞○丁亥諭福潤奏山東臨濟營副將萬年青近來遇事懈怠罔知振作以致時有匪類在營混跡該員漫無覺察實屬約束不服請旨懲儆等語提督銜記名總兵臨濟營副將萬年青著開缺以參將降補餘著照所議辦理該部知道○諭福潤奏通陳辦理地方緝捕情形一摺據稱山東曹州濟南兩屬盜風未戢往往因捕拿緊急結黨成羣施放洋鎗肆行拒捕黃河北岸平原一帶及邊境之夏津等縣亦間有馬賊遊弋扮作防營出差弁勇查路兵役不敢盤查每至曠野搶掠車輜現

在調撥營勇分投緝拿等語該省盜賊如此橫行若不隨時從嚴懲辦何以靖閭閻而安行旅著福潤嚴飭派出各營會同地方文武實力兜拿認真盤查毋得稍形疏懈並著通飭各屬一體嚴密巡緝若再有失事之案卽著從嚴參辦毋稍姑容所有平原縣疎防差弁湯復曾舉人李如蘭等在途被劫及利津縣典史衛署被劫各案內匪犯已獲之李因等四名薛長林等八名卽著嚴行審訊按例懲辦以昭炯戒○安維峻奏臣恭閱邸鈔陝甘督臣楊昌濬片奏爲已故河州鎮總兵沈玉遂在河州城內建修祠宇已於光緒十九年十月內一律告竣工堅料實足垂久遠請旨飭部立案列入祀典由地方官春秋致祭此事臣早有所聞所以未卽奏參者欲觀該督入奏時作何措詞耳今閱原奏乃歎該督之欺我皇上一至於此也查該督初爲沈玉遂請卹之奏飭敘放東高州戰功既經副都御史楊頤察其虛捏奏請駁正會奉旨將該督交部察議矣此次在河州建祠乃就本地按畝加徵集貲巨萬於是大興土木之功規模閎敞金碧輝煌洵哉工堅料實足垂久遠矣而不知百姓之困於徵比者其情狀爲可憫也聞該州士民初擬聯名向學政稟控嗣恐觸該督之怒禍成不測因而中止該管官乃於建祠之地張貼欽奉上諭一道以恐之百姓懾於國法屈於官勢痛心疾首敢怒而不敢言今原奏內稱據署河州鎮總兵沈福田署河州知州查之屏轉據該處官紳軍民人等稟稱云云臣曾訪諸該州來京會試舉人敘云呈中

所列之名大半本人所不知間有知者非係地方劣紳卽該鎮私人也又原奏云民情愛戴一聞建祠之命無不歡忭鼓舞迎卽集捐款鳩工庀材夫以鞭扑而得之財賦供其經營而謂出自民願此與昔人稱追比樂輸者何異 皇上明見萬里之外尙以該督之言爲可信耶我 朝永遠不加賦 祖訓煌煌昭垂萬世今乃按畝加徵是 皇上所不忍爲者臣下竟公然行之河州距省極近該督卽欲謾爲不知其誰信之且該督與沈玉遂同鄉拂民之欲以徇私情豈所謂大臣法者哉署該鎮總兵沈福田非他人卽沈玉遂之弟也知有其兄而不知有民一若我自爲政民其如我何律以不知避嫌之咎猶其小焉者也至譬如州查之屏以所治之民剝取其膏諂奉上司之意無非爲升官計耳而其心度不堪以自問臣平心而論故總兵沈玉遂循分供職本無過舉但附祀前陝甘督 臣左宗棠祠已足償其勞勩專祠之建設該總兵有知亦當內愧於心不敢受其禮祀原奏謂克復州城後該總兵卽蒞斯任舉辦營後事宜政績多端此乃龍統之語卽使縷析條陳之要皆職分當爲之事我 朝自開國以來任該鎮總兵能撥職者不知凡幾若人人得邀祀典恐城中祠宇林立無復居民廬舍矣近來保舉之濫早經 聖明洞鑒獨此建祠一事俎豆千秋關繫尤重而紛紛奏請者竟等諸應酬人情之舉核其政績了不異人故意張大其說以動 宸聽乃至剝削民膏而亦謂之順輿情如該督此奏者非欺罔而何臣非不知今日之

督撫樞身重大言之適以結怨然不敢不言者懷辜 聖明之恩而蹈緘默之咎也又奏陝甘督臣楊昌
溶奏請將已故提督周達武逾格 加恩從優 賜卹並於立功省分建立專祠戰功事蹟 宣付史館
立傳業蒙 允准在案臣伏思該提督在川在黔戰功誠不容沒若在甘肅提督任內當軍務肅清之後
不過循分供職雖歷任十有七年有何異常勞勩可稱且高臺縣匪噍會一案該提督誤聽該縣知縣捏
報不待督臣調度輒自派兵去剿以致玉石俱焚無辜良民同時罹禍者四百餘人附近村莊橫遭擄掠
婦女投壘赴井死者又不知凡幾卽獲犯八人處斬時有一人爲其親戚鳴冤欲行承保長跪哀號亦卽
混入並斬至今相傳綁了八人斬了九人者正指此言該提督當時張大其說謂若何接仗若何獲勝一
似於川黔兩省而外又添一省戰功者於是大開保舉督臣譚鍾麟率據入奏後雖悔之而事已無及乃
將捏報之知縣及副將某以他詞奏參革職藉平衆怒而專擅殃民之提督周達武不復置議卽保案亦
不便撤銷至該提督爲河西講舍購書一節人咸謂其尅扣兵餉用以要結士心爲吳日俎豆馨香之計
臣雖未敢深信但武備是其專責何勞越俎代謀文事祀典之設所以崇德報功也若令循分供職之員
一概俎豆千秋何以愛人心而資觀感況該提督罪浮於功尤顯于衆怒者乎但既經奉 旨允准安知
一二感恩私室之人不呼朋引類聯名呈請建祠者因而勒捐苛派剝削民膏在該提督約施而豐報拚

之情理既不得謂平而民力不堪重困當又 聖心所惻然者近日祀典太濫廣西巡撫張聯桂爲貪婪之蘇鳳文請祠經該省御史奏請 收回成命卽該督前亦爲禱罪之琦善請祠曾奉 嚴旨斥駁今又爲提督周達武請矣竊謂他省之建祠與否自有公論非 臣所敢與知惟甘肅應請 明降諭旨不准爲該提督建祠以見功罪之不相掩並使天下知 朝廷慎重祀典而濫請之風或可少息 上諭軍機大臣等有人奏陝甘總督楊昌濬爲已故河州鎮總兵沈玉遂在河州城內建修祠宇按畝加徵集資鉅萬大興土木該州士民等敢怒而不敢言該督前爲沈玉遂奏請優卹摺內所稱該處官紳軍民人等稟請呈內所列之名大半本人不知另片奏已故提督周達武在任多年並無異常勞績高懸牌匾會一案謾騙知縣捏報派兵剿辦殃及無辜請降旨不准建祠又片奏甘肅候補道陶兆熊總辦肅務任意苛索楊昌濬未敢查問迄今三四年之久又未更換各等語著鹿傳霖派委道府大員按照所參各節確切查明據實覆奏原摺片三件著鈔給閱看將此諭令知之○戊子楊昌濬奏 臣接准禮部咨開御史安維峻糾參大員徇袒冒籍假公行私各情飭卽查明聲覆等因伏查甘肅新贛自軍務平定以後人烟稀少地土荒涼雖經奏請分闕鄉試創設行省而應試士子無多前督 臣左宗棠暨前學 臣多方招徠准外省人入籍考試無非爲鼓舞羣情起見因而軍營人員服官此地亦有子弟順便入學者其時重在招人實地

無暇計其實籍不實籍卽本地土紳亦無過而問者近數年因客籍士子中式後到京會試甘肅京官不肯出結經部議准令改歸原籍蒞任後當以寄籍應試各省皆有原所不禁惟父兄在此地服官不應令子弟朦混考試卽嚴飭各屬遵照並查出從前有子弟在甘省中舉而父兄尙在甘遊宦者立飭改省而去卽如前年陳寶璇陳霖曾正實籍捐監入場中式旋即奏明褫革其非偏袒已有明證所有己丑辛卯癸巳三科凡湘人仕於甘者並無子弟中式之事至於他省人員有無冒籍無人告官亦何從知之茲奉前因當與司道嚴加察訪惟查得試用巡檢李景庚之子李運達入兩當縣學中式上年癸巳恩科第七名舉人李景庚係湖北孝感縣人又因案撤任寧遠縣同知郭昌猷以寧遠府實缺同知其子入寧遠府屬寧州學試屬荒謬糊塗顯干功令無怪安維燠大聲疾呼上瀆天聽也相應請旨將試用巡檢李景庚寧遠縣同知郭昌猷一併革職並將李運達舉人卽行褫革寧州學附生郭錫光已經學臣褫革應卽勒令回籍不准逗遛以爲朦混取巧抑榮者戒除李炳珩曾入鎮西廳籍有無呈明案據應由新疆撫臣查明奏咨外謹將現在遵查緣由據實具陳上諭楊昌濬奏准禮部咨查甘省服官人員子弟朦混考試據實覆陳一摺據稱甘肅新疆自軍務平定後奏請分闈鄉試創設行省前督臣左宗棠及前任學臣因應試士子無多多方招徠准外省人入籍考試近數年客籍士子中式後曾經部議准令改

歸原籍惟父兄在此地服官不應令子弟朦混考試茲查有試用巡檢李景庚之子李運通入兩當縣學中式癸巳恩科舉人又因案撤任寧靈縣同知郭昌猷之子郭錫光入寧夏府屬靈州學該二員均係他省籍以不惟父子異籍且令其子朦混考試實屬荒謬糊塗顯干功令請旨斥革等語甘肅試用巡檢李景庚寧靈縣同知郭昌猷均著卽行革職舉人李運通著卽行斥革已革靈州學附生郭錫光著卽勒令回籍不准逗遛以爲朦混取巧者戒該部知道○己丑 上諭 關帝廟拈香○庚寅諭步軍統領衙門奏本年四月二十六日巳時安定門外外館地方竊鹽貨房被賊搶去銀錢等物請將疏防劫案之專汛營員交部議處一摺筆數之下竟於白晝出此搶劫重案該汛官等捕務廢弛咎無可辭北營安定汛守備黃宸千總馬成麟把總邢厚源經制外委邢保和李逢春均著交部議處仍勒限嚴拿逸犯務獲究辦倘限滿無獲再行嚴參○上諭巡視北城御史恩溥奏京營捕務不嚴請編查保甲一摺當諭令步軍統領衙門順天府五城御史妥議章程具奏茲據會同具奏並將緝捕章程二十條保甲章程十條呈覽朕詳加披閱所稱技勇營練兵除抽調守衛圍牆外僅贍五百五十名不敷分布請再抽選四百五十名一節緝捕兵丁全在認真挑選勤加訓練方資得力若藉口巡緝不敷動議增加人數不過虛糜餉項仍屬無濟於事所請著毋庸議仍著將現有之兵分別選派實力整頓以期一兵得一兵之用其保獎一條向

來凡遇捕獲重案所有獲匪出力員弁應俟刑部定案後聲明請獎然所獲人犯往往經刑部訊問有情節不符若先行請獎易滋弊竇嗣後八旗及五營地面拿獲明火重犯著於定案後准其從優請獎以昭核實餘均依議行各該衙門務當按照章程切實辦理不得空言敷衍日久仍成具文○壬辰以肅清湖南武岡山門會匪功予總兵余虎恩等優敘有差○癸巳婉貴妃薨○諭本年恭逢 慈禧端佑康頤昭豫莊誠壽恭欽獻皇太后六旬萬壽元旦令節朝賀筵宴業經照例舉行本年朕六月慶辰及冬至令節典禮均應一體舉行以光盛典所有一切應行事宜著該衙門敬謹預備○諭前據御史安維峻奏江蘇崇明縣產鹽包解地方違例設引擾民滋事各節當經諭令劉坤一等確查具奏茲據奏稱崇明設立鹽局時閱十餘年官經五六任並非費永濟為之創始至試辦以來官商無不虧折既於國課商情皆無利益即著永遠停撤以後應如何認真整頓使淮私不致侵佔於國計民食兩有裨益之處仍著浙江巡撫督飭該運司審查情形妥速籌辦崇明縣門丁金竹經被逮後輒敢改易姓名充當局書致招物議業經責懲著飭令地方官嚴加管束不准復出滋事其餘所參各節或事出有因或傳聞失實均著毋庸置議○甲午大祀 地於 方澤 上親詣行禮○以 慈禧端佑康頤昭豫莊誠壽恭欽獻皇太后六旬萬壽慶典予頤和園工程處主事積慶等升敘有差○乙未兩○諭前據御史安維峻奏甘肅鄉試冒籍

甚多請申明嚴禁例當諭令禮部議奏茲據該部復奏士子冒籍應試例禁嚴乃近來甘肅省竟有
官場子弟及親戚朋友買入學籍甚至僱倩拾替互相徇隱實屬不成事體應申明例章以杜流弊嗣
後甘肅及新額各屬外來舉戶著仍照光緒三年奏定章程自領地納糧之日爲始扣足十年方准呈明
入籍並於考試時確查的籍其年限未滿及已滿年限未經呈明者均不得冒考倘有冒籍弋取者除本
生斥革外並將送考考官議處其該省服官人員倘有縱令子弟及親戚隱混考試者並由該省
督撫學政嚴行查禁一經發覺卽將本生本官及徇庇容隱各官分別斥革參處出結同鄉京官如有扶
同捏飾情弊照例議處餘依議○丙申諭軍機大臣等有人奏內務府員外郎慶寬本非旗人身家不清
同治年間曾充崇文門監督驗貨家人冒入內務府漢軍旗籍朦朧員外郎兼銀庫差使又派總辦各要
件盤踞把持於應發庫款必密令扣出恩銀勒令出具甘結侵蝕乾沒不能以萬數計招搖納賄百弊叢
生請飭查辦等語著派徐桐敬信按照所參各節嚴密確查據實具奏不准瞻徇情面曲爲開脫原片均
著鈔給閱看將此諭令知之○諭軍機大臣等都察院奏已革湖南候補知縣張銘以大吏枉法營私冤
參屬員勒扣巨案等詞赴該衙門呈遞案關被參冤抑牽涉大員侵吞軍餉賄和巨案情節較重應澈
底根究以期水落石出著張之洞按照原奏各節確切查明據實具奏原摺呈及公稟均著鈔給閱看將

此諭令知之○予故總兵陳國瑞按察使金國琛建祠○予故陝西留城縣同知陳文獻列入國史循吏傳○戊戌諭上年十二月間兵部奏請飭催各省營制冊籍以憑纂輯會典當經降旨令浙江雲南福建及臺灣等省各督撫轉飭提鎮卽行按照部頒款式統限於文到三箇月內一律造齊報部現在已逾限期各該省是否造齊報部著該部查明如有尙未造報者卽行咨催倘再遲延著該部照例奏參其各省土司冊籍並著該部遵照前旨查明一律辦理○己亥諭軍機大臣等前據恭壽奏雅爾堅此次進京隨帶官兵十七名之多所需路費擅扣兵餉私動庫款有各佐領圖結可證各節當諭令雅爾堅明白回奏茲據奏稱隨帶官兵十七名係照向章辦理並經將軍批准辦稿始行派定該官兵等所需飯食盤費悉由該副都統俸廉項下開給並不知有擅扣兵餉私動庫款之事至所稱各佐領圖結可證之處恐係恭壽勒使出具等語與恭壽前奏迥不相同著裕祿廖壽豐切查明據實覆奏毋稍徇恭壽片雅爾堅摺均著鈔給閱看將此諭令知之○孫家鼐等奏竊維居安不可忘危有備方能無患近年順天府屬屢被災祲調查歷屆用款以光緒十六年爲最鉅除棉衣及義賑不計外銀則八十五萬五千餘兩錢則五十萬串米糧則四十五萬餘石上年災賑內亦用銀七十二萬數千餘兩米糧十五萬二千餘石之多仰荷 聖恩蠲截漕優加賑恤並經各省官紳等顧念畿疆同籌捐助故於辦理賑務尙能勉強支持刻

下大祿已過賜爾應時糴民和似無他慮顧鹽款乃天行之常水旱雖盛時不免惟能先時國度得餘三餘九之謀庶無臨事張皇致呼癸呼庚之慮臣等輾轉籌思竊計賑款非請撥於部庫卽告繼於鄰封現在庫藏未充鉅款何堪展動民生日蹙賑捐豈可常行思每年漕運米糧儲於倉場者歲得百餘萬石除發放兵米俸米外歲可餘數十萬石然太倉之米陳陳相因濕蒸霉變從古已然是以往年放賑費發倉米率一石而僅得七八斗之用其遠道不便轉運者奏請變價率一石而僅得銀一兩數錢之用考南糧山海道運京每米一石合米價運費計之需銀三四兩有餘由河運來者其費尙不止此國家歲時轉漕其費用若此之艱小民領受國恩其折耗若此之鉅此等漏卮誠爲可惜擬請於江蘇浙江每年河運漕米內各撥出五萬石爲順天府備荒經費自光緒二十一年起歲以爲常並請將此兩項共十萬石漕米折價同輕糴簡兒錢運腳等項一併解順天府由臣等隨時採買現在海道暢通江南山東奉天等處米糧旬月之間咄嗟可致將來積穀存銀因時酌度務使儲粟不虞夫朽蠹發倉不致於招運竊計如此辦理託皇上福庇順天所屬能得十年鹽稅則銀穀俱有贏餘首善之區雖有堯湯水旱之災辦賑可免竭蹶黎民亦不致失所陳蘇奏臣以樗櫟之材世受國恩荷蒙任使茲學差未滿復蒙簡畀郊圻傳曰民爲邦本況乎密邇京畿尤爲本中之本若不爲久遠之計徒以轉運期會塞責非特有負

知遇卽心亦無以自安矣伏查順屬自光緒十四年至今六七年間大水爲災已經三次民間困苦情形可以想見懲前毖後所宜綢繆於未雨之時臣五夜思維積穀一層實爲當務之急而承平時常平社倉等項自咸豐年間軍務以後大半無存況當迭次被災蓋藏久空安得有可積之穀有手惠心總賴皇上天恩浩蕩恭查上年冬間欽奉 諭旨以欣逢 大慶賞給各省銀兩而直隸每年定爲二萬兩朝廷深念畿甸民艱有加無已臣之愚見欲援此例推廣 慈恩可否每年再於抵通南糧內酌給順屬一二萬石以備不虞先就各處舊有倉房修理存儲積有成數再議推廣敬擬求 賜名曰仁壽倉以誌不忘其中大益有四敢備陳之山水乘高其來最驟數日之間河路則練道漫溢陸路則文報不通其中迫切呼號情狀不堪設想及至領到官欸而荒村僻壤已有迫不及待之勢有此一項愛民之吏一面報災一面由臣衙門批准卽可散給無文書之往來無轉運之耽擱早辦一日之事多救一日之人大利一也北方田收本薄每遇歉歲紛紛入京習爲故常以至良善之民亦無留戀鄉里之意其中不逞之徒因此生事盜賊之案誘拐之案層見迭出使各屬皆有儲蓄則可以責其撫綏而兼爲肅清郊甸之計大利二也此項穀石應由臣衙門委員卽在通州領取量度地勢儲備運費先儘四路同知數年之後四路積有成數又推之二十四州縣查嘉慶年間故督臣方觀承辦理通省義倉不下百十處當時有國有祿

曾經奏進有案 皇上如此施行 恩逾覆瓿 臣等奉宣 德意極力勸導民孰無良亦當自謀久遠但得歲事告登需以歲月愈推愈遠愈積愈多參以存七糶三之法則春首之平糶在其中矣村社有倉則小祿可以自給矣承平之蓄可望漸復大利三也近年庫帑支絀籌款甚難所幸太倉陳陳相因不虞匱乏核計每年運京清米約在百餘萬上下此內動撥一二萬不過百分中之一分公家無損而閭閻受益無窮大利四也或者謂不肖州縣藉此侵挪往往有名無實此誠不敢必其無然地方公事何一可付之不肖之手此自在上司之細心綜核不徇情面而未可因噎廢食也伏惟 天庾至重原非臣下所得妄請惟京師天下之本順天四路正所以輔翼京師如四支之捍頭目況我 皇上堯舜之仁卽光緒年間京外被災處每畝一特旨截留漕糧合計何止數十百萬昔人有言先時發一錢可當兩錢之用急時發十錢不當一錢之用反復思之實確而理至是不勝悚惶激切之至 上諭本日據孫家鼐等奏請於江浙浙江每年河運漕米內各撥五萬石爲順天備荒之用一摺順天各屬近在畿輔朕軫念民艱每遇水旱截漕發帑無不立沛恩施無虞稽滯該兼尹等所奏雖爲積穀備荒起見惟荒政固應豫籌而立法尤宜權審江浙河運米石數本無多能否照撥倉糧積存日久有無流弊著戶部通盤籌畫妥議具奏前據陳彝奏順天積穀請於每年抵通南糧內酌給一二萬石建倉存儲著戶部一併議奏○庚子兩○諭前

據國子監司業瑞澂奏各省附保補弊請旨嚴禁當經諭令吏兵二部將各項保獎嚴行考覈茲據吏部兵部會同嚴定保舉章程分別辦理著照所請嗣後各項保舉凡非應保之案率行列保及例有年限保案未及年限列保者均著全案撤銷其有尋常勞績作異常勞績請獎者著全案駁回另行更正或全案合例有一員在不應保之列者著將該員保案撤銷或全案合例有一員與例不符者著全案駁回俟更正到部將合例之員議准不合例之員撤銷不准再行請獎至駁令更正之案該大臣仍以原保請獎者著將全案撤銷並將原保大臣據實嚴參雖有合例之員亦無庸給予獎敘經此次嚴定章程後中外大臣其各懷遵諭旨嚴實辦理不得再有違誤致干咎戾餘依議○辛丑諭太僕寺奏司員誤公據實奏劾一摺本月二十四日太僕寺帶領引見承辦名牌之籤帖式隆恩屆時未到非尋常疏忽可比左司員外郎奎鳳應有備牌一切並未隨帶亦屬疏忽太僕寺員外郎奎鳳籤帖式隆恩均著交部分別議處○諭戶部奏稽查雲南貴州兩省銅鉛運務各員期滿請旨更換一摺雲南辦解十四起頭批京銅貴州辦解京鉛已據分報起程此後承辦銅鉛次第運解前派沿途經理各員期滿該部查照例案將經過之四川湖北江蘇直隸等省藩臬開列名單請旨更換四川著派王毓藻湖北著派陳寶箴江蘇著派陳湜直隸著派裕長卽黃成各該員嚴飭各道府及沿途地方文武員弁認真稽查催護前進如有無故逗遛及盜

賈短少等弊詳報該督撫嚴行參辦沿途應需水師照料之處卽由派出之員詳咨前途督撫及水師提督調遣仍著自奉旨之日起以三年爲限均責成此次所派之員一體經理遇有升調事故卽令接任之員遵辦期滿再行更換○壬寅邵友濂奏查臺灣雲林一縣向在林圯埔建治嗣因林圯埔迫近內山氣局褊小經臣奏請移駐斗六地方聲明林圯埔應否添設佐雜分防批司飭府察度情形另行妥議辦理奉部覆准并將縣治移駐日期由司詳咨在案茲據臺灣府知府陳文驤查得林圯埔雖非居中扼要之區第地近內山宵小最易藏跡亦不可過於空虛且近來該處腦務日盛各腦丁等五方雜處良莠不齊民情又復強悍難保不滋生事端現移縣相距離二十五里恐有鞭長莫及之勢似不可不添設佐雜分防以資彈壓擬請添設縣丞一員名曰雲林縣林圯埔分防縣丞舉凡竊盜賭博等案俾可就近查拿實於治理有裨所有緝捕界址卽以附近之涉連西螺海豐布嶼四保歸該縣丞分防餘境仍由雲林縣典史管轄並可將雲林縣舊署作爲縣丞衙門毋庸另建該縣丞並分徵錢糧其廉俸役食等項悉照彰化縣鹿港縣丞之例由雲林縣在於徵收錢糧存留項下開支至應定何項缺目並未盡事宜另再妥議辦理詳由臺灣布政司唐景崧等轉請奏咨頒印發領並聲明俟奉部覆准後再行遵員前往署理等情前來臣查林圯埔地方空虛既據該府查明擬請添設縣丞一員分別緝捕實爲因地制宜起見似應准如

所請下吏部議奏○癸卯兩○諭張煦奏解審發回絞犯中途脫逃請將該差體解不愼之屬縣交部議處一摺山西鹽鎮總校犯武殿汶卽武全仔由省審勘發回監禁該差體解各官並不愼選妥役小心防範致該犯中途脫逃實屬非常疏忽著照例議處仍勒限嚴緝逃犯武殿汶務獲究辦倘限滿無獲卽行從嚴參處餘著照所議辦理○諭前據步軍統領衙門奏本年四月二十六日安定門外外館地方義豐貨房被搶一摺當經降旨將疏防營員交部議處勒限嚴拿逸犯究辦茲據巡視北城御史恩溥等奏勘驗被盜情節諸多不符請交刑部審辦以昭核實等語此案著交刑部提集案內人犯悉心研鞫務得確情據實具奏○甲辰 上諭 大高殿祈晴○諭禮部題本年六月萬壽禮儀一摺著於二十六日辰時升殿受賀已時筵宴餘均依議行○乙巳諭軍機大臣等總理海軍事務衙門會奏遵議黑龍江將軍等奏收龍鄂倫春牲丁酌擬章程變通辦理一摺覽奏均悉所擬將原設總管等概行裁撤五路佐領等悉仍其舊布特哈總管改爲副都統並於黑龍江墨爾根呼倫貝爾布特哈四城各添設協領一員分司經理各節均依議行卽著依克唐阿按照此次變通章程督率各城新設副都統協領及原設佐領等認真經理設法撫綏予限三年各該員辦理如有成效准由該將軍奏明請獎倘限滿無功卽著嚴參懲辦原摺著鈔給閱看將此諭令知之○諭步

軍統領衙門奏續擬緝捕章程請旨變通辦理一摺據稱近來盜蹤日張兵丁緝捕愍不知畏往往攜帶洋鎗施放傷害官兵擬請變通章程准其格殺勿論等語盜賊拒捕膽敢用火器傷人近有巡夜弁兵被賊以洋鎗轟斃之案實屬目無法紀嗣後巡夜官兵准其執持鳥鎗遇有賊盜放鎗拒捕亦准放鎗扼拿如有殺傷照例勿論惟官弁兵丁等務須格外慎重倘輕率從事傷及無辜定當從重懲辦○命昆岡承修醇賢親王園寢宮門圍牆工程○許景澄奏臣於本年二月二十一日承准總理衙門電開奉旨總理各國事務衙門奏現辦帕米爾界務情形一摺著許景澄按照該衙門節次電商辦法與俄外部相機辦理自郎庫里至阿克塔什一帶為邊防扼要之地務當切實辯論俾就範圍妥籌擬結一俟議有端緒即電知該衙門奏明諒旨遵行欽此等因伏查此案先於光緒十八年九月間接總理衙門來電俄使喀希尼奉外部命議分帕界出示地圖欲自烏什別里轉東南達背喀約一直往南之說令臣與俄外部辯論臣即前赴外部詰問一面奏請增繕邊備以杜敵謀旋據外部總辦格昂尼斯稱俄國擬按地勢就分水山嶺為界喀約語太寬混恐難作據顯露違約佔地之意經臣據理駁斥屢催照約議分該外部旋覆中國所議辦法俄國亦不能允界議因此齟齬其時俄國入帕兵隊雖經撤歸尚在穆爾格布河等留設兵卡度冬至十二月間新報稱俄謀增兵欲佔巴勒庫爾及塔哈爾滿各地邊事頗為喫緊經總

理衙門電嚴辭詰論上年二月間始據該總辦面告謂中國在色勒庫爾山嶺之西指出實地俄國可以酌商詞氣稍鬆三月初以洋報得聞俄將調兵赴帕因向署外部大臣基斯敬曉譬利害遂與約明兩國今歲各不進兵以待和商經臣先後電達總理衙門在案此上年四月以前之商辦情形也自去年以來喀城邊境漸臻安靜而議界一節該外部以總理衙門所指地界自烏仔別里西偏至薩雷庫里仍如初議延不接商時值俄外部大臣嘎爾斯自義國假旋養病鄉居臣以駐法參贊官慶常前在俄都與嘎爾斯熟識三月間曾經商令該員前赴奧國訂晤探論帕事因奏請暫調慶常來俄催商該員於七月初到差經與嘎爾斯辯論再四始允會商兵部候十月俄主回都時開議詞據交閱地圖擬讓耶庫里北半之地臣以離約太遠當即駁覆至十一月間俄英所商帕事頗有成說臣因電商總理衙門爲扼要與爭之計按照約文往南地勢順阿克拜塔河至小帕米爾山嶺略示通融俄外部仍不肯允並據嘎爾斯稱實因兵部所爭在通印度之路此路正在阿克蘇河以東地勢相扼爲難殊甚本年欽奉諭旨後復曉以耶庫里阿克塔什一帶尤爲中國注重之地萬不能讓杜其覬覦經嘎爾斯轉達俄主據復仍爲兵部堅持且有俟開凍後派兵據守之議臣以成約具在不能過涉遷就仍飭慶常力執原議不爲所動三月間嘎爾斯始以外敵一時難結另籌調停訂明兩國各不進兵徐候此事定議以保和好旋接總理

衙門電覆再令切實訂定復由慶常與俄商明互送照會爲據是月十八日臣接俄外部文稱本國國家已飭俄兵仍紮原處於帕界未經定議以前不准前進等因當即電達總理衙門查照竊維中外交涉之案商議不合勢必出於相持惟當邊境兩軍近逼事機輒與牽掣今互約止兵議由彼發興於顧全事體之中稍收消弭釁爭之益除將俄外部來文譯送總理衙門備案並以後情形另行續報外謹就臣與俄外部商辦界務現在情形恭摺具陳待 旨該衙門知道

六月丁未諭前據兩江總督劉坤一奏保道員李經楚兩廣總督李瀚章奏保道員陸維祺發往廣東補用並仍交軍機處記名請旨簡放嗣於李經楚謝恩召見時因其在江蘇服官詢以洋務等事奏對未能明晰惟以大員之子未加深究茲據給事中稽成博奏該員從未親民並無實在政績與原保請求吏治得失各節諸多未符等語劉坤一向來辦事認真此次保舉未免瞻徇所有李經楚前發往江蘇補用及記名簡放之處即著撤銷又據奏陸維祺前爲李瀚章幕友李瀚章輒行保奏殊屬不合陸維祺所得發往廣東補用及記名簡放之處亦著撤銷嗣後各督撫保舉屬員務當懷遵迭次諭旨秉公核實毋得稍涉濫用副朝廷延攬人才慎重名器至意○戊申命鳳鳴奏移 婉貴妃金棺○浙江提督馮南斌卒予祭葬建祠戰功事蹟交國史館立傳賞其子福田主事○己酉諭翰林院侍讀學士文廷式奏請飭各

省督撫甄別屬員嚴加劾治等語各省屬吏賢否全在該管上司認真舉劾方足以進退人才近年明保密保之案各省紛至沓來惟於貪劣不職之員往往任意容隱參劾無多於吏治民生殊有關繫嗣後著責成各該督撫將不肖官吏隨時秉公參奏不得瞻徇情面貽誤地方用副朝廷澄叙官方激勵人才至意○諭翰林院侍讀學士文廷式奏捐納非經久之制請概行停止以維政體等語國家暫設捐例原屬不得已之舉近來仕途擁擠人品混淆頗滋流弊道府大員有兼司表率之責尤非未諳吏治捐資濫列者所能勝任著戶部卽將道府兩項捐例先行停止其餘各項實官花樣應如何分別停止之處並著該部悉心妥議具奏○以張其光爲浙江提督劉祥勳爲浙江温州鎮總兵○庚戌先是葉志超帶隊赴朝鮮後我國遵乙酉華日派兵先行文知照之約照會日本日乘此陸續派兵赴漢城仁川迫令朝鮮自認非中國之屬我駐朝通商大臣袁世凱以事變日亟電致李鴻章懇召回面商和戰各情舉唐紹儀自代鴻章電商總理各國事務衙門至是軍機大臣等奉 旨現在日韓情勢未定袁世凱在彼可以常通消息且與各國駐韓使臣商議事件亦較熟悉著毋庸調回○癸丑京師淫雨 上再詣 大高殿祈雨○諭御史鍾德祥奏參內務府員外郎慶寬身家不清招搖納賄等情當派徐桐撤信嚴密確查茲據查明覆奏此案慶寬被參各節經徐桐等調查該旗戶口冊及一切案卷核對慶寬出身年歲及伊母姓氏年

歲均屬不符是其身家不清冒入旗籍不爲無據該員任鈔庫七年爲時甚久新居精麗炫人耳目且有發歛扣利之事以致物議沸騰顯有包攬營私情事內務府員外郎慶寬著卽革職銷除旗檔著步軍統領衙門將該員房屋財產查抄入官以示懲儆○諭軍機大臣等前因邵友濂請調南洋兵輪三四艘赴臺協助當令劉坤一酌派備用茲據電奏南洋兵輪不敷分撥擬調南琛兵輪及威靖運船兩號前往臺防恐難得力請於北洋廣東再調數號赴臺等語著李鴻章電商李瀚章酌量派撥○乙卯 上御承光殿日本國使臣小村壽太郎覲見○以德恩爲伊犁索倫領隊大臣○張仲忻奏山東河工保案近年多至五六百人推原其故由於吏部會定以每決口門一處准保異常尋常者六員以爲雖甚盛漲至多不過十餘處耳孰意所報決口之多森概以所保之人數爲衡如擬保六百人則稱決口一百處市決之時並無呈報既築之後更無考查甚或一二十里內竟至百處有餘臣不知此六七百人何所託足其冒濫可知矣故凡有謀保舉者皆以山東爲捷徑捐一丞倅雜職不數月卽儼然正印賄囑資緣無所不有今該省大吏亦頗有應接不暇之勢故又請停佐雜分發臣竊以爲絕其流不若清其源相應請旨飭交吏部將山東河工保案更定章程或定以每決口一次准保若干員或比照永定等河工辦理則冒濫自除矣 上諭御史張仲忻奏山東河工保案請飭部更定章程等語著該部妥議具奏○閩模奏實

邊莫先於興屯興屯莫難於招戶新疆自經兵燹地曠人稀部議將直隸山東山西河南四川陝西甘肅七省免死減等人犯改發新疆助屯立法不可謂不善嗣因到配不安耕作有室家者方行起解防弊不可謂不周光緒十五年復經前護撫臣魏光燾奏准釋罪入籍爲民被恩不可謂不厚計必地日加闢戶日加增用副朝廷實邊至意乃臣到任以來疊據各屬稟報逃亡仍復不少成本概屬虛懸在屯者憚於耕耘迄無成效甚至欺壓平民窩藏奸宄闖畝搶劫之案層見疊出欲興屯田而其弊如此良由遺犯不盡耕氓語以稼穡之艱難或非所素習此輩本屬敗類欲令肅然爲良善更有所不能斯卽勉就鈴東不至潛逃而以此無賴之徒聚居邊塞荒曠之地當不徒虛擲帑項遺誤屯田爲可慮也臣與蒲泉兩司再四籌商以爲欲救其弊莫如將前項人犯概行停解就地之民力懇求種之田畝上年臣覆奏編修胡景桂條陳摺內應招無業墾民設法安插之議誠以墾民世居邊徼身與地習卽心與業安招一戶可收一戶之效各屬老戶生長蕃育歷有年所擬擇壯丁較多者酌量加撥地段主伯亞旅本屬一家地既議增力必倍奮是一戶更得二戶之用如此辦理就地可以取材公款無須多費而逃亡虧本各弊不禁自絕當庶亦可漸臻此其利害較然不得不及早變計者也下部議奏○丙辰前任江南提督李瑚斌卒予祭葬建祠戰功事蹟交國史館立傳賞其子廣東通判李達璋以同知用○諭裕祿等奏查勘永

陵明堂泊岸本年宜修工程請擇吉興工一摺著欽天監於本年六月內選擇吉期先行知照卽著盛京將軍會同工部侍郎屆期敬謹興修餘著照所議辦理○丁巳李鴻章電致總理各國事務衙門葉提督佳電倭日益猖獗韓急望救援各國調處卒無成議此時速派水陸大軍由北來超率所部由此前進擇要扼紮託名諒商若至決裂免致進兵無路此上策也否則請派商輪三四隻來牙將我軍撤回蓋我軍爲剿匪來匪既受撫卽撤回亦係正辦撤後行文各國公使並日廷申前次同撤之約如彼不依秋初再圖大舉是爲中策若守此不動徒見韓人受困於日絕望於我且軍士既無戰事久役露處暑雨受病殊爲可慮請速賜電示遵行等因鴻按鈞署現正與日商未便遽添大軍致生疑阻上策似須緩辦其中策與袁道同見前鈞電有或撤或移之說鴻初慮示弱惟所稱軍士露處受病亦係實情可否照辦請速核示 上諭軍機大臣等葉志超電已悉所籌派輪赴牙將我軍撤回一節彼頓兵不動我先行撤退既示弱且將來進剿徒勞往返殊屬非計現在和商之議迄無成說恐大舉致計卽在指顧著李鴻章體察情形如牙山地勢不宜卽停論葉志超先擇進退兩便之地扼要移紮以期迅赴戎機毋致延誤○諭前據御史端良奏寶泉寶源兩錢局鼓鑄廢弛均以鑄錢工本銀兩收買制錢交庫當經諭令戶部查明具奏茲據戶部奏請寶泉局四廠匠役逐日工作鑄成之錢每有分限運局報部候提實無收買制錢充數

交庫情事等語該御史所奏自係傳聞之誤卽著毋庸置議惟錢幣爲兵餉民用所需關係重大嗣後著兼管錢法堂侍郎不時到局嚴密稽查如該廠錢文有識記攙雜質色次舊等弊卽將該員匠等分別重懲以維圖法而資整頓餘著依議○諭前據御史張仲炘奏前因平定回苗各匪方略告成在事出力人員援案獎敘實覺優逾常格請飭部比照成案酌爲核減當經軍機大臣將原片所指各節據實陳明與上屆成案大略相同等語向來方略原載別項保案爲優惟朝廷慎重名器不厭求詳著吏部查照粵捻方略請獎成案酌量核減○諭軍機大臣等有人奏特參大員執法營私縱盜害民請飭查辦一摺據稱河南臬司長祿性耽逸樂信任家丁爰茂臣爰穀臣爰梅臣假以權柄狼狽爲奸知縣蕭慶恩吳興綬周光昌耶益厚均與之結拜兄弟周書麟許成忠劉傳性皆以賄賂得缺署開封府知府濮文暹招權納賄多令屬員拜認門生桐柏縣知縣徐鑑鈞以六白金爲費每遇控案曲法袒庇廬煦春馬駿清植慶恩許成忠皆以重資拜居門下在南陽時釋放著名會匪刁老八後復勾結聚眾擾害居民終恐釀成巨患等語著許振祿按照所參各節據實具奏毋稍徇隱原摺著鈔給閱看將此諭令知之○鄭思儼奏設局抽收釐捐本一時權宜之計近年以來屢奉 諭旨嚴行整頓裁議併至再至三誠愛惜物力體恤商情之至意也乃以 臣所聞各省現設總局分卡仍復不少如江西一省而論多至七十餘處商貨來往各卡

分成扣收已不無藉端抑勒之弊而多一局即多一處之開銷多一差即多一人之剋削以小民有限之脂膏 國家有定之帑項顧令虛糜濫耗徒飽官吏之私囊究於 國課毫無增益果何取乎夫法積久則弊生大利所在胥吏把持勢所必有若不及時裁汰流弊將有不知底止者擬請 飭下江西撫臣及直省各督撫統將現設各局悉心籌辦酌留水陸當衝之處認真稽查嚴防繞越偷漏其餘分局小卡盡行裁撤吏胥少一需索商民亦少一留難至零捐併為大宗餉項可以無虧而糜費自可稍節 上諭御史鄭思賢奏請飭裁併各省釐局等語釐捐之設實濟餉項原屬不得已之舉前因各省局卡林立賠累商民迭經諭令設法裁併不啻至再至三各該督撫自應遵照辦理以期上裨國用下體商艱乃本日後據該御史奏各省現設局卡仍復不少江西釐局多至七十餘處需索留難虛糜濫耗弊端百出亟應再加申禁著江西巡撫及各直省督撫將現設各局悉心籌辦酌留水陸當衝要處所認真稽查防繞越偷漏其餘零星局卡即著核實刪減毋得以無可裁併為詞一奏塞責仍將裁定數目迅速覆奏○裕祿等奏前准會典館咨舉辦會典輿圖行令奉天將舊界新界地方沿邊沿海口岸入海之支河汊港遴派留心地理之員周歷訪查考訂測繪頒發欽定輿圖格式限期一年查照所頒格式測繪省圖及府廳州縣圖各一分附以圖說送館核辦等因當經臣等以奉天志乘所存地圖原係乾隆年間繪本迄今年分久遠

旗民生聚河道變移各處市鎮川原與昔既多同異且自東邊北邊及海龍城等處分設廳縣分疆畫界
較舊制更有不同非周歷詳勘另繪新圖難期核實而計里開方按切天度辦法尤須測繪精詳方無外
錯奉地在關外官紳兩全向少講求測繪之人即行咨商直隸督臣李鴻章署船政大臣閻浙督臣卞寶
第調取天津水師學堂教習候選縣丞王慶煊福建船廠給事縣學生候選巡檢陳清祥奉天北西學堂學
生候選從九品莊公魯來奉測繪精資妥辦並以奉省地面遼闊為期緊迫恐致測繪難詳奏明展限欽
奉硃批著照所請該衙門知道欽此隨即購備儀器飭令王慶煊等詳細舉辦其圖說及一應修纂事
宜則另委留奉補用同知王志修專司編輯佐領寶海試用知縣蘭維焄候選知縣趙成翼宗室營主事
富明降補同知鞠成霖候補騎校英桂慶榮候補都司張兆慶等分司繕校並先後派委升任青州副
都統兵司協領訥欽現任兵司協領達春督理其事自光緒十八年春間起該員等周歷測繪每至一處
先測准治城經緯度數再測四外山川村屯即人跡罕到之地如東邊通化縣屬之十八道江至二十四
道溝東四千餘里僅於樞境可通亦必親詣其地實測實繪不敢畏難稍涉敷衍其人里鳥里之分古名
今名之異稍有不合必重往測量再四考訂務使毫髮無疑方敢據以入繪時閱兩年餘而全圖始就由
分發總分別經緯計里開方共成全圖一府圖三直隸總圖一興京同知所屬圖一昌圖府鳳凰圖

興京同知自理地面圖三廳州縣圖二十二其圖後總說及表內之沿革疆域天度山鎮水道鄉鎮職官
皆依奏頒格式編列至奉天各府州縣向無志書所有奉會典館行查奉天自設立行省以後省會及府
廳州縣之治所疆域之四至距府距省距京之遠近官司之領屬及各府廳州縣之城池學校營制驛傳
戶口田賦稅課物產等一切事宜亦均檢查檔冊稽考新章繕晰條分編輯成書並所繪輿圖共裝訂十
二冊現俱一律告成呈請派員齎送會典館查核采輯由該委員等詳請具奏前來等因欽此加考核測繪
尙屬合法所輯圖說亦尙詳晰除將圖冊派委候補驍騎校英桂齎送會典館外所有奉天全省輿圖測
繪完竣緣由恭摺具陳下所司知之○戊午剛毅入京祝 嘏以李瀚章兼署廣東巡撫○沈秉成奏續
獲會匪訊明分別懲辦並擬懇擇尤保獎得 旨准其照奏定章程擇尤酌保毋許冒濫○諭裕祿等奏
特參經徵糧捐延不清解之防禦請革職嚴訊勒追並查封家產備抵一摺法庫邊門防禦文會經徵該
處盤捐欸目甚多經裕祿等派員前往清查提解該防禦與鋪商恆德彩等以賬目纏糊不清互相推諉
延宕追撤任後勒限嚴催限滿仍復狡執堅不交清殊屬膽玩文會著卽行革職交裕祿等嚴訊勒限一
箇月如數清繳一面將該防禦家財產查封存備抵償再任意延宕或交不足數卽著分別是侵是挪照
例治罪監追以重庫欸該部知道○己未諭軍機大臣等現在日韓情事已將決裂如勢不可挽朝廷一

意主戰李鴻章身膺重寄熟諳兵事斷不可意存畏葸著懷遵前有將布置進兵一切事宜迅解覆奏若
顧慮不前徒事延宕馴致貽誤事機定惟該大臣是問○辛酉諭朕前恭讀 世祖章皇帝御製勅習要
言一書誨諭精詳有功世道當經發交武英殿刊刻成書賞給內外臣工並令各直省督撫重刻宣講以
裨風化茲據邵松年奏河南早經刊印頒發又經河南府重刊頒學但恐各邑尚未徧及懇飭廣行刊發
等語著各直省督撫飭知各屬准其重刻廣行頒給務使窮鄉僻壤家喻戶曉俾得遷善改過一道同風
用副朕化民成俗至意○諭張煦奏革員虧短正雜各款等銀請旨監追查抄等語暫革山西降補知縣
張式芬前在大寧縣任內虧短正雜各款及倉米價銀為數甚鉅業經降旨暫行革職勒限追繳迄今限
滿屢傳未繳實屬玩延張式芬著卽革職監追一面將該革員歷過任所寓所資財嚴密查抄提集經手
丁書人等究明是侵是挪照例嚴辦並著四川總督雲南巡撫務將革員寄籍原籍家產一併查抄備抵
以重庫款該部知道○諭張煦奏革員虧短鉅款避匿無蹤請旨通飭拿辦一摺已革山西托克托城通
判汪爾禮前因虧短正雜各款逾限未繳先後降旨革職監追詎該革員已先期聞差避匿難保不匿跡
原籍或遠颺他省著山東巡撫及各直省一體嚴拿務獲解赴山西監追審辦以重庫款而儆藐玩該部
知道○召袁世凱回國以唐紹儀代辦總理交涉通商大臣○邵松年奏 臣維堯舜禹湯文武周公之道

至孔子而集其大成刪詩書定禮樂贊周易修春秋六經明而聖人之道備宋周程張諸儒崛起千百年後倡明絕學至朱子而集其大成大學中庸有章句論語孟子有集註四書定而聖人之道彰故自元明以來四書五經家絃戶誦學校之教士以此 朝廷之取士以此先儒所謂爲天地立心爲生民立命爲往聖繼絕學爲萬世開太平朱子有焉迨至我 朝尊崇尤至 伏讀 聖祖仁皇帝御製朱子全書序文曰朱夫子集大成而緒千百年絕傳之學開愚蒙而立億萬世一定之規窮理以致其知反躬以踐其實朕讀其書察其理非此不能知天神相與之奧非此不能治萬邦於衽席非此不能仁心仁政施於天下非此不能合外內爲一家朕讀書五十載只認得朱子 天語煌煌尤足昭垂萬世 臣又讀 高宗純皇帝上諭朕聞謝濟世將伊所註經書刊刻傳布多係自逞臆見肆詆程朱甚屬狂妄從來讀書學道之人貴乎躬行實踐不在語言文字之間辨別異同況古人著書既多豈無一二可以指摘之處以後人而議論前人無論所見未必悉當卽云當矣試問於己之身心有何益哉況我 聖祖將朱子升配十哲之列最爲尊崇天下士子莫不奉爲準繩而謝濟世創爲異說互相標榜恐無知之人爲其所惑殊非一道同風之義等因欽此仰見 列聖尊崇朱子表章正學二百餘年學者服膺誦習道一風同粹然一出於正雖其間學問淹博之士自據心得立說著書未嘗不可羽翼經傳然 功令所著場屋文字不得有背

朱註故釋經儘可兼採諸家而應試無敢稍恣異議皆列聖洞燭後世小儒雜學之流弊有以維持以至於今也近年臣見洋印各種書出價廉易購誠有便於寒賤而毛奇齡所著四書改錯亦已洋印徧行天下竊謂毛奇齡博文強識豈後世學者所能及改錯一書間有心得何嘗不有功朱子無如私心自用徒逞才辯詆毀先賢不留餘地其言曰四書註無一不錯合九州之鐵不能鑄此錯是何言歟此等議論風氣淺薄之區聰明穎悟者競尚新奇不求實濟得之足以助其饒而揚其波其爲士習人心之患實非淺鮮而北五省向未之間者以其書原未廣播也今河南已有他省可知倘任其流傳高明之士惑於其說以爲程朱不足法抑知經書義蘊精深淺學豈能一時窺得乃舍程朱而別求治經之法將徒博虛聲毫無實際其爲患於學術者尤大擬請皇上降旨嚴禁其書並諭令中外大小臣工及天下學校凡有教士之責者咸懷遵列祖聖訓恪守程朱過考試文藝有不遵朱註妄生異議者雖高才概擯勿取庶學術以正人心可維士習既端風俗自厚誠國家久安長治之本上諭邵松年奏請尊崇正學一摺據稱毛奇齡所有四書改錯自逞才辯詆毀先賢近來石印盛行高明之士惑於其說以程朱爲不足法請飭嚴禁等語四書改錯一書有違正解於士習頗有關繫現在河南既有此書他省恐亦不免流播著各直省督撫出示嚴禁不得再行出售至較閱文藝自當恪守功令一律以朱註爲宗不得錄取異說

致乖文體用副朝廷崇尚正學至○頒給河南登封縣嵩陽書院匾額○壬戌諭軍機大臣等有人奏安徽道員顏允文本在浙江候補有人托捐道員該道吞沒鉅款自捐道員分發湖南經前撫臣奏參革職追沈集成署兩江總督黃綏奏保開復發往安徽補用充支用賑捐兩局差使將實收兩張賄贈沈集成之子沈炳琳等復爲案送各屬臚儀並因侵蝕局用浮開煤價鑽營點景差使向藩司索銀在上海冶遊情事又試用道許景壽爲之爪牙署鳳順道時勒索陋規請飭查參等語著德壽按照所參各節確切查明據實具奏毋稍徇隱原片著鈔給閱看將此傳諭知之○諭御史安維峻奏請嗣後明保之案倘係賄徇情面且於例不合經人參奏得實除將保案撤銷外並將原保之大臣予以嚴懲等語著吏部議奏○諭御史安維峻奏兵部學習郎中張彬前由中書交方略館當差報捐郎中到署數日卽保無論題選咨留遇缺卽補並加三品銜請將該員保案撤銷等語兵部學習郎中張彬到部未久資格太淺所得方略傳信案著卽撤銷該部知道○鹿傳霖奏於光緒二十年三月十四日承准軍機大臣字寄光緒二十年三月初六日奉 上諭有人奏士子舞弊俸中監臨飭法彌縫據實揭參一摺據稱上年甘肅新中第七名舉人李運達原籍湖北黃陂縣以伊父李景庚服官省分暫入兩當縣學籍上年鄉試僥倖搶手湖南李某在場中換卷俸中嗣因搶手案計謝銀呈控楊昌濬以搶者中者均係同鄉瞻徇情面囑令內

監試胡孚駿等代出銀兩和息並聞有更換題卷情事請飭查辦等語冒籍考試例禁嚴李運達事既敗露楊昌濬何以置之不辦猶復曲爲彌縫著鹿傳霖派委道府大員前往確切查明據實覆奏不得稍涉徇囑原摺著鈔給閱看將此諭令知之欽此遵卽先行委員分路察訪旋復派委督糧道松壽馳往甘肅按照原參各節認真查辦當將訪察大概情形具奏並請將李運達舉人斥革 飭下該原籍湖北督撫臣密飭查拿究辦在案茲據委員督糧道松壽按照原參各節逐一訪查確訊稟覆前來臣覆加查核原奏謂李運達原籍湖北黃陂縣係卸署甘肅循化廳主簿李景庚之子於其父服官省分冒入兩當縣學籍將其父名減去景字捏爲李庚以冀掩人耳目一節查李景庚現在甘肅候補當卽查傳到案訊據供稱係湖北孝感縣人甘肅試用巡檢親子運達隨侍來甘光緒十三年科試伊子在兩當縣冒籍入學上年鄉試得中第七名舉人等情又調取學臣衙門學冊查得李運達所填三代曾祖名符祖名坦父名庚調查官冊李景庚係試用巡檢光緒三年到省籍隸湖北漢陽府孝感縣十四年委署循化廳主簿十五年卸事其三代則曾祖名時夏祖名方蕃父名逢坦是李運達其父服官省分冒籍俸中事屬確鑿所填三代皆減去上一字不止減去父名景字其原籍確係湖北孝感縣原奏稱係黃陂縣人係屬傳聞之誤又原奏謂上年鄉試李運達僱倩搶手湖南李某在場中換卷因而俸中一節訪之眾論衆稱上年闈

照所刊李運遠文字與其平素所作迥出兩手有謂債得同號之人代作卽係搶手湖南李姓者有謂係鄭姓者雖人言嘖嘖竟不得實指其人據李景庚稱伊子運遠本屬能文氏屬書院考取有名伊一介窮員何能出貲爲子僱倩搶手以其子素性狂妄開罪於人致招物議可俾到面試等語以李運遠既不覆試又早回籍顯係因事敗露畏罪潛逃據稱伊子於中式後於十二月初三日令其回籍省親拊養並非逃避再三究詰狡展異常堅不承認債搶各情查核原奏係稱搶手湖南李某有姓無名今李景庚既不承認李運遠又未到案一時殊難查究又原奏謂榜後搶手向李運遠索討謝銀六百兩李運遠抗不承交九月初九日舉行鹿鳴宴當監臨以下各官及新舉人入宴時該搶手在督署門首喊嚷遞呈聲言稟揭李運遠俸中之由旋被同鄉各官將搶手扶往兩湖會館說情該督臣楊昌濬以搶者中者均係同鄉瞻徇情面囑令監試蘭州府知府胡孚駿外供給所阜寧縣知縣宋昇平共代出銀六百兩交給搶手爲之和息一節隨飭據蘭州府知府胡孚駿稟蘭縣知縣宋昇平覆稱上年鄉試揭曉後於九月初七日舉行鹿鳴宴是日督署大門洞開主考學院監臨司道各執事等官及新中舉人畢集觀者擁塞如有搶手索謝喊嚷情事難掩衆人耳目並無奉督臣囑令說和等情查原奏稱該省上年鹿鳴宴爲九月初九日現查係初七日是日期先後不符且是日各官齊集耳目眾多卽使有搶手索取謝銀似不至於大庭

廣衆之時肆無忌憚公然稟許恐係傳聞失實現經確切訪查督臣尙無囑令說和給銀之事又原奏謂且聞該督有囑令藩司及監試提調將李運達墨卷更換令本人自行磨寫之語其已未更換不得而知一節查准甘肅藩司咨稱上年鄉試取中各卷遵照定例於揭曉日隨同主考監臨內外廳官在衡監堂將取中各卷每十名爲一封黏貼監臨及藩司印花封固裝箱委員解部呈交在案並無監臨囑令將李運達墨卷更換磨寫情弊等語則並無將李運達墨卷更換磨寫之事尙屬可信以上各節現經分別查訊詳細訪詢惟實籍倖中事屬確鑿若換卷說和則查無實據至倩拾舞弊不爲無因然非李運達到案不能訊究得實應請將縱子於服官省分冒籍倖中之甘肅試用巡檢李景庚先行革職發交阜南縣看管勒令將其子李運達交出以憑確訊李運達前已經臣奏請將其舉人斥革現經查明其原籍實係湖北漢陽府孝感縣前補係黃陂縣人係屬錯誤仍應請 旨飭下湖北督撫臣密飭原籍孝感縣查拿李運達到案確訊實情照例究辦至督臣楊昌濬於李運達在其父服官省分冒籍倖中當時失於覺察究屬疏忽應否交部察議之處出自 聖裁 上諭鹿傳霖奏巡查甘肅士子舞弊倖中據實復陳一摺據稱李運達實係湖北孝感縣人在其父李景庚服官省分冒入甘肅兩當縣學緒上年鄉試倖中舉人至換卷說和查無實據倩拾舞弊事出有因請飭查拿歸案審辦等語已革舉人李運達於鄉試後未經覆

試卽行回籍雖保非因事敗露畏罪潛逃卽著張之洞譴繼洵嚴飭查拿解交鹿傳霖歸案訊辦楊昌溶雖據查無贗徇情面等事惟於李運達冒籍倖中失於覺察究屬疎忽楊昌溶著交部察議餘著照所議辦理該部知道○癸亥 上諭 大高殿並 宣仁廟拈香○李鴻章奏上年籌議永定河辦法擬擇要地添修減水石壩分洩盛漲經戶部據函附奏欽奉十一月十三日 寄諭蘆溝橋以東增築減水大壩乾隆以後具有成規事尙可行應如何擇要添築之處著李鴻章妥議具奏等因欽此當派臬司周馥前往會同候補道張連芬該河道萬培因查得該河從前減壩甚多現僅存南二金門閘北三求賢壩俱在河之中腰不甚得勢近年異常盛漲未至減壩而上游已溢上游上灰壩建自道光年間減漲初甚得力迨後河底淤高光緒十八年放水奪溜遂卽堵閉今欲添建減壩應於上游蘆溝橋南岸擇其易於減溜而不奪溜之處相度建置以補南上灰壩之不足減下之水仍歸南上減河故道不致另佔民地雖創實因惟斟酌水勢地形必欲常漲少減異漲大減而又不致吸奪正溜此中消息機宜頗難探討復派精於測算之副將陳季同洋員吉禮豐赴工會勘議於蘆溝橋以上南岸卽上年漫溢處所建設減壩甚屬合宜酌定壩口寬五十丈龍骨金剛牆及出水坦坡緩箕俱用大料石砌做連同兩面石堤土堤壩下減河共估需銀二十六萬七千四百五十九兩時值東河督臣薛振祿奉命查勘永定河上下游情形以該

處建壩爲釜底抽薪之計仿照成規行之決定有益必當就大汛以前迅速趕成會同臣奏蒙 恩准飭部撥銀三十萬兩以應急工當派候補道寶廷驛駐工監修隨時會商周馥等妥辦限於汛前告成並委大順廣道吳廷斌會同辦理本年二月初十日開工飭將做成分數逐月報核計自興工以來每日夫匠萬數千人分投力作晝以繼夜喘汗不停需用料物繁多派員四出購運並於北上石堤工內移緩就急以資接濟又慮限期過迫灰漿未能乾透過水或致衝損開平煤礦有仿洋式製成塞門得土運來三百數十萬斤以之鈎砌石縫填築槽底戰石灰堅結易乾該司道等激勵員匠多方懲勸分段責成均皆踴躍用命幸天氣暢晴款料應手臣復催飭竭力趕辦據報於五月十五日全工完竣計砌成壩垛料石能骨寬五十丈高八尺大料石坦坡寬五十丈進深三丈五尺出水筒寬五十丈進深十九丈內用大料石鋪砌三丈塞門土和沙石築成十六丈能骨兩面金剛牆高二丈二尺五寸進深四丈一尺兩面片石堤共長三百五十九丈高一丈三尺五寸至二丈一尺五寸不等土堤共長一千四百十三丈四尺高九尺至一丈一尺不等頂寬二丈五尺至三丈五尺不等開挖引河長七百五十丈深四五六尺不等寬五十丈三十丈不等下游護村堤長一千四十四丈臣檄派委用道劉啟彤前往逐細丈量驗收均屬相符各工堅固整齊布置如法絕無草率偷減足以宣洩盛漲裨益工防其高低尺寸亦均斟酌至當陳季同

與古禮細加考核若正河水漲一丈四尺八寸與龍骨相平漸漲則漸洩若照光緒十九年異常大漲
橋上應過水六尺必不掣動正河大溜致添下游德河之患惟此處出山之水過於迅猛河中積成沙灘
坍漲無定嗣後每年汛前須測量一次以沙灘之坍漲定龍骨之高下應資成該河道隨時與河防局妥
商籌辦以期經久無弊該橋保固日期即自本年五月十五起限照例保固三年至該處地當孔道伏秋
減臨洩水文報行旅未免阻滯擬建鋼橋一座長五十丈寬一丈六尺可過三千斤重之大車橋之兩面
護以鐵欄建設燈架二頭接鈎石道並加石欄應設石橋墩七座每座高一丈五尺即砌於龍骨之上此
橋應向西洋訂購鑄造屆時本年秋後運到明春始能設妥今夏壩上過水暫行設船濟渡以便行人再
查原領部款三十萬兩除撥歸浚船項下用銀三萬二千五百四十一兩外壩工實照原估用銀二十六
萬七千四百五十九兩惟原估並無橋工在內現已墊款趕辦俟橋成之後核計不敷若干即在賑捐欸
內提用屆時核實報銷下部知之○甲子諭軍機大臣等御史烏爾慶額奏工部琉璃窑有已革虞衡司
書吏余翼朝父子盤踞還溜腰扣把持等語著工部堂官按照原奏各節查明具奏○諭前據孫家鼎等
奏請於江蘇浙江每年起運漕米內各撥五萬石爲順天備荒之用陳絲奏順天積穀請於每年抵通南
糧內酌給一二萬石建倉存儲當經諭令戶部妥議具奏茲據奏稱河運漕米合江南北不過二十餘萬

石萬難分撥卽令江浙兩省改本爲折爲數太多亦虞窒礙至請撥漕米一二萬石分儲各州縣辦理非人亦多流弊擬請將湖南歲辦京漕折價解部備用等語著照所請所有湖南每年應辦京漕三萬石嗣後毋庸辦理卽將米價水腳等項共合銀七萬二千三百餘兩按年解交部庫以備緩急備荒經費一欸每年共應解部銀十二萬兩遇閏加增銀一萬兩著自本年起由戶部專催各省逐年如數報解另欸存儲以備順天賑撫提用餘依議○乙丑以福裕爲奉天府尹○丙寅以何維楷爲江西按察使○諭國子監司業瑞沅奏現在道府捐例既停請將捐資道員非由正途及曾任實缺者先補知府藉令練習公事等語著吏部議奏○瑞沅奏恭查會典事例雍正十三年奏民人冒入旗籍者照過繼民人爲嗣例入於另記檔案內嗣後永不許民人冒入旗籍違者除本人治罪外報保之該管官一併交部議處等語厥後屢經奉旨議行道光初年復經立限清查並定另冊章程通飭遵辦當時查出官兵以民人而冒入旗籍者已有二千三四百員名之多俱蒙寬免治罪另冊註明及身而止迄今又越多年成規漸邈奸僞日以滋厲清釐幾若不行議者至謂八旗官兵半係民人語雖近激非過論也查各旗丁冊原有編審之例本爲杜絕假冒今則廝與之卒皆蝕錢糧勦薪之家亦多乞養卽以清語而不曉詢以姓氏而不知始猶竄名聞散漸至報捐送考矣初僅承嗣孤孀繼且廢官襲爵矣迨其一旦得志竟僞然以閥閱世

家自託名種初不計職者之議其後此種弊端外旗固所不免內務府利之所在朦混尤多該管參佐管領各官視為故常從不舉發致成積重難反之勢雖有稽察御史久等濫竽各該都統及內務府大臣職務殷繁並皆未能兼顧旗務之壞殆已非一朝一夕之故矣近日被革員慶寬一案積久始發其倖未敗露者尙不知有凡幾若不亟行清查任令良賤混淆屬亂旗族何以別流品而除宿弊合無請 旨飭下各旗都統內務府大臣確切查明據實具奏各該冒入旗籍官兵如係自行呈首另冊註明其所得官職錢糧仍准存支及身而止曾經出兵立功者本身及子孫俱改入各該旗漢軍以示區別倘不自首經該管官查出或別經發覺卽行斥革銷檔並查取道光元年都統英桂等會議章程參酌辦理至積弊已久並非始自近年所有歷任都統內務府大臣以次該管各官應得處分仰懇 天恩概予免議以示激勵庶隱匿自少察出無難矣或謂旗務紛紛整頓不易欲期廓清銅弊誠恐窒礙難行不知所窒礙者但不利於假旗人耳則一閒冗卽少一冒支於 國家經費旗人生計均屬有益 上諭國子監司業瑞洵奏請清查民人冒入旗籍以別流品一摺民人假冒旗籍本干例禁若如該司業所奏宣名報部送考等弊諸多朦混該管參佐管領各官從不舉發殊屬不成事體著八旗都統內務府大臣按照原奏各節確切查明參酌成案奏明辦理○戊辰諭前因御史烏爾慶額奏工部琉璃窑已革書吏余翼朝父子盤踞膜

捐等情當諭令工部堂官確查具奏茲據稱傳訊該客商及書吏等大概情形請飭查拿余翼朝到案
質訊等語著步軍統領衙門順天府五城御史將軍吏余翼朝一體嚴拿務獲交部審辦餘依議○諭御
史楊震奏地方防剿盜賊原屬綠營專責現既不能裁勇又復養兵糜費滋多擬請各省酌留防營整頓
綠營如果兵不如勇即應空缺不補以節餉需等語各省留防勇營原爲剿辦大股盜匪之用至綠營兵
丁散布各州縣皆有捕盜之責亦當訓練精整以資守禦豈可任其疲弱不加裁汰徒糜餉項著各省
督撫會同提鎮各員嚴飭所屬各營大加整頓務使一律精壯不得仍以老弱充數如有可以裁減之處
即將空額停補以昭核實將此通諭知之○日人於朝鮮牙山洋面擊我租用英國高陞輪船沈之○已
已諭軍機大臣等南澳鎮總兵劉永福著譴鍾麟飭令酌帶兵勇前往臺灣隨同邵友濂辦理防務○許
振祿奏臣前月渡河勘查兩岸各工均由撫臣前攝河築時指示機宜加意籌備現在各屬埽段均已盤
壓穩實萬錦灘至五月底或報水長二尺或報水長一丈而黃河僅長數尺大溜仍趨中洪武陟沁河於
六月或報長水尺餘或報長水四尺而次日仍即消落現在各屬偶遇適溜卽行加埽拋石不數日卽將
適溜挑出此兩岸各屬埽修情形如此也惟其石料有餘故耐遇溜卽堵因而無險可名臣於去冬河防
局新欸早飭通判黃履中採石一萬方分布各屬今已一律運畢此次臨工覆勘加辦碎石一千八百方

以爲大汛期內慎益加慎之計無論以後河勢如何當不至臨時束手此皆仰蒙 皇上天恩當日定章
俯從臣請用能先時預防而臣與工員得以倖免罪戾也顧臣竊有請者當日河防局之設微臣亦具有
拙誠不得不出於此如近日屬員辦公頗稱無弊然試思人之賢愚不一才之敏鈍不一各屬營弁汛兵
大半皆勸屬員省錢之人未有勸屬員多費之人即令多備物料然工之堅實與否非目擊者不能知也
大河關生靈性命若徒恃文檄申誠終必流於虛欺而後已臣當時詳擇監工委員不徇情面力求其能
任艱苦而又深知河務者計七屬各派二三員終年在堤凡遇應添之埝應護之壩而催該屬速爲搶辦
協同防堵而其中稍有不實亦卽密以告臣故營汛弁兵不能售其術而屬員亦礙此耳目不能不認真
趨事而自顧考成矣近來積弊之除則半由監工委員之力不然臣有何術者臣既設河防局於汴城而
委員分派各工復有專司辦石之員計皆在沙塵烈日之中風雨波濤之下寒暑積勞之病層見迭出每
多再三求退臣皆未允以爲生當 聖明宜各自奮不在區區名利也惟事久變生亦恐有弊故臣定章
河防局歲支十二萬兩局中不經手銀錢卽委員薪水亦另籌款不得於此開支局用此十二萬兩點滴
入工而大要在專辦石方故大險恃以無恐蓋大事無定險來每出意料之外其四十八萬第以資屬員
之認真歲修而已若無工慮忽生大險則不能責之屬官必當加費搶救然非拋石不爲功故此十二萬

兩者常則可以爲培植之資變則可以爲保固之要臣之求免重咎而藉以仰紓宸帑者亦卽在此臣誠不敢移用他工一意以辦石爲主但使每年霜降後卽先購石萬方則次年安瀾已有得半之望否則此款散用誠恐全功盡棄又如河防局員臣既屏絕情面則此勞苦趨工之人必不能省然亦不必多用擬限定人數二十員足敷兩岸調派故前歲兩年請獎卽以是爲準合無仰懇天恩飭各部臣查照立案嗣後每年河防局領銀十二萬兩卽先辦石一萬方不得他用短減其餘或加辦石或另積土照此常行不改自可備患而有餘又河防局額定監工二十員永遠不得增派一員計兩年安瀾照常勞績請獎除黃河廳員及沿河州縣照例請保文職二十員營汛另行的保外其餘河防局監工出力之二十員亦乞照常勞績一體給獎庶於要工有裨而臣亦得稍收指臂之助上諭許振禔奏請將河防局用人用款限定例案一摺據稱河防局歲支銀十二萬兩專辦地方大工恃以無恐局員監工人數擬限定二十員足敷兩岸調派永遠不得增添兩年安瀾照常勞績請獎等語著照所請嗣後河防局每年領款卽責成承辦之員認真經理以期工歸實用監工各員准其兩年保獎一次以二十人爲限照常勞績請獎毋許冒濫餘著照所議辦理該部知道○辛未 萬壽聖節 上御太和殿受賀賜王公大臣筵宴○賞溥倫三眼花翎○命徐用儀在軍機大臣上行走○邵友濂奏查臺北上府屬大嵙崁地方在南

雅山下宅地與衍環繞同北距淡水縣治七十里南距新竹縣治一百二十里轄淡水寶爲兩縣沿
山扼要之區光緒十二年間前撫臣劉銘傳請派內閣侍讀學士林維源幫辦臺北撫臺事務曾以南雅
地方可分一縣奏陳 聖聽在案該縣自開辦撫臺以來民番交錯久成市鎮近年茶葉樟腦萃集於此
商賈輻輳生業日繁且地逼隘防又值歷年用兵之後奸民游匪出沒靡常彈壓稽查在在均關緊要若
照前撫臣原議分設縣缺則糧額並無增益轉多分疆劃界之煩若暫事因循則淡水縣連附府城又苦
鞭長莫及是非府佐分防不足以資控制節經委員會縣勘擬批飭司道督同該府核議擬請派分防同
知一員管束社番兼捕盜匪作爲衝繁難調要缺名曰臺北府分防南雅里番捕盜同知以淡水新竹兩
縣沿山地界歸該同知管轄所有民番詞訟竊盜賭匪等案准其分別審理拿禁遇有命盜重案就近勘
驗通報自徒罪以上仍送該管縣審擬解勘轄內疎防案件照督緝例開參如蒙 兪允應請 飭部先
行頒給臺北府分防南雅里番捕盜同知關防俾昭信守至該同知應支養廉擬請按照基隆同知年支
銀八百兩由司給領其廉額俸銀應照例支銀八十兩並照澎湖分防通判請設各役四十九名年支役
食銀三百三兩八錢編入淡水縣存留項下勦支據藩司唐景崧會同臺澎道顧肇熙詳稱請奏並聲明
勘建衙署募設書吏應由添設之員察度辦理等情前來臣覆加查核係爲因地制宜起見是否有當謹

恭摺具陳下部議奏○又西輪軍機大臣等邵友濂電奏已悉林維源請准其留辦臺灣國防事務○是月日斯巴尼亞國使臣德拉拔回國參贊梁威璵署理

東華續錄

光緒一百二十一

臣朱壽朋敬編

臣章圭琛恭校

秋七月乙亥朔時享 太廟 上親詣行禮○諭朝鮮爲我大清藩屬二百餘年最修職貢爲中外所共知近十數年該國時多內亂朝廷字小爲懷歷次派兵前往戡定並派員駐紮該國都城隨時保護本年四月間朝鮮又有土匪變亂該國王請兵援剿情詞迫切卽諭令李鴻章撥兵赴援甫抵牙山匪徒星散乃倭人無故添兵突入漢城嗣又增兵萬餘追令朝鮮更改國政種種要挾難以理喻我朝撫綏藩服其國內政事向令自理日本與朝鮮立約係屬與國更無以重兵欺壓強令革政之理各國公論皆以日本師出無名不合情理勒令撤兵和平商辦乃竟悍然不顧迄無成說反更陸續添兵朝鮮百姓及中國商民日加驚擾是以添兵前往保護詎行至中途突有倭船多隻乘我不備在牙山口外海面開砲轟擊傷我運船變詐情形殊非意料所及該國不遵條約不守公法任意鴟張專行詭計擬開自彼公論昭然用特布告天下俾曉然於朝廷辦理此事實已仁至義盡而倭人渝盟肇釁無理已極勢難再予姑容著李鴻章嚴飭派出各軍迅速進剿厚集雄師陸續進發以拯韓民於塗炭並著沿江沿海各將軍督撫及

統兵大臣整飭戎行遇有倭人輪船入各口卽行迎頭痛擊悉數殲除毋得稍有退縮致干罪戾將此通諭知之○丁丑諭朕欽奉 慈禧端佑康頤昭豫莊誠壽恭欽獻皇太后懿旨據李鴻章電稱直隸提督葉志超一軍在朝鮮牙山一帶地方於六月二十五六等日與倭人接仗擊斃倭兵二千餘名實屬奮勇可嘉加恩著賞給該軍將士銀二萬兩以示鼓勵戎行至意○榮祿入京祝 嘏以鹿傳霖兼署西安將軍○以葉曾春爲新設黑龍江布特哈副都統○戊寅先是李鴻章電致龔照璣托其在英購新式小快船每點鐘行二十里外者至是龔照璣電覆云英有新式小快船船內有雷抓敵雷機并快船行十六邁須一月交由李鴻章電奏得 旨海軍定須多備快船方能得力現撥銀二百萬兩款足敷用卽著李鴻章迅速定購克期送華以濟急需○追予故大學士富俊將軍德英於吉林建祠○展辰 上詣 大高殿並 時應宮拈香○諭軍機大臣等著李鴻章察看丁汝昌有無畏葸縱寇情事不得有片詞粉飾○電 諭李鴻章飭平壤後路陸續添兵援應大同口令海軍各艦梭巡營盤山海關等沿海各口加意嚴防腹地等省兵勇舊隊得力將領迅卽調派○辛巳 上詣 紫光閣拈香○監紳入京祝 嘏以劉坤一兼署江寧將軍○壬午王文韶等奏 臣等於本年三月二十八日將剿辦勞匪攻破兇巢擒獲首匪各緣由馳奏在案四月十九日由驛遞回二月二十八日初次奏報原摺以奉三月二十三日 寄諭此股

夷匪負隅自固出沒無常屢經抗拒官兵勢甚猖獗若不乘其初起之時迅圖撲滅必致蔓延爲患著王文韶譚鈞培添派得力員弁厚集兵力審察地勢奮力追剿以期掃穴擒渠勿任此孽被竄一面解散舊從以孤匪勢川滇剿辦情形著隨時馳奏以慰廑系等因欽此仰見 聖訓周詳機宜密授欽感莫名伏查東山黑夷類族既雜頭目亦夥此次被丁洪潰谷老四等妖言胡佛煽惑勾結遂致蠢動其附近山外夷寨多被脅從匪中頭目如張管事楊廷貴封甲長卽洗酒扒熊千金王阿路子及水頭山逸匪谷老十楊文才李朝品等實繁有徒是以丁洪潰等雖已伏誅該黨仍屬聚不散 等語飭總兵馬桂李福興黃河洲劉銳恆蘇倫元游擊馬秉雲等分道進攻而以安撫事宜責成道員翁壽鎮妥籌辦理連日迭據該道等稟稱參將劉銳恆督同土舍高振業之妻高章氏前往山外開導夷民曉以利害先後安撫二十六寨同知姜瑞鴻亦派永北廳司獄彭若浦安撫夷民十一寨各軍糧路疏通始克分投進剿三月二十九日李福興由期納拔隊前進據銀嶺營夷自山寨迎請歸順葛給與招撫旗幟四月初三日督同管帶土勇副將李自新土目高海滄進攻河父喇七甲黑勞自恃地險依山抵拒搖旗吶喊矢石相集兵勇不便擇地紮營匪黨於初四五等日兩次下山猛撲均被我軍擊退乘勢鼓勇進攻鎗礮齊施相持半月匪黨不支李自新率隊直攻賊巢登時將匪首張管事擒獲鎗斃黑勞十餘名餘黨出巢奔竄黑勞所用多係

毒弩中人輒死傷斃戰兵一名團勇數名探聞谷老十王阿路子等屬集於知母等處李福興等約集各營於四月十四日分路進攻辰刻至耶白裸過匪黨五六百人蜂擁迎敵奮勇攻擊斃匪百餘名立將耶白裸賊寨攻破進殺數里該匪預將山路挖斷不能窮追次日跟蹤搜剿將倮羅坪機羅等處賊巢攻燬斃賊多名直抵裸叻等山勢壁立下臨大江外委張汝發軍功馬慶壽戰兵馬長貴王銀青等擊斃獐進均被該匪滾石下擊立足不定墮江沉沒哨弁馬榮魁張和祥夷目余子秋分路繞越山嶺排鎗猛擊賊始敗逃互相傾擠跌落入江者不少二十一日黃河洲由羊四廠馬乘雲由騰舍居馬桂由仙谷同時齊進先攻知母等匪黨伏匿深林不出我軍合圍包抄以鎗礮連環轟擊匪黨受傷極多遂自焚寨屋從煙焰中衝遁而出藥弩四射勢甚兇猛我軍穩紮穩打不少退卻匪黨紛紛狂竄各營跟追賊中悍黨經此數戰斃斃甚多李福興拾獲熊王金谷老四二名訊據生供匪首王阿路子身受鎗傷率敗黨數人逃至江邊存亡不知下落是役也各軍於深巖窮谷之中親冒毒弩搗石仰攻三晝夜掃蕩匪巢多處計斃黑勞一百五十餘名生擒不計官兵中勢陣亡五名帶傷二十餘名夷練傷亡十餘名攻克知母等後李福興黃河洲李自新分任搜剿波宜河南岸寬苦巴裸四甲地所過夷寨只餘老弱婦女並無賊蹤馬乘雲馬桂分任搜剿耶白裸撤裸嶺得三甲半地該勞夷等星散處山坡或三五戶七八戶並無村寨山內

營中勞夷各舉董事夷民來營割鋸木刻誓不反側經姜瑞鴻入山安撫人心大定此山內各營圍剿東
山知縣管擒獲匪首張營事等並搜剿各夷寨之實在情形也劉銳恆蘇倫元兩營自各軍上山後劉銳
恆卽赴臘人寨等處分起扼紮蘇倫元分兵駐守高寨衙衙坪防匪外竄仍派勁旅四出偵緝四月初八
日劉銳恆率隊入山所遇路烘坪坪落帶黑夷迎降未敢拒敵初九抵婆婆河匪寨仍敢放弩搖石官軍
奮勇上前生擒勞目燒姑拔一名派隊押令前進剿匪首封甲長卽洗酒扒置於二得莫遣人詐降欲
誘官軍深入經劉銳恆窺破揮軍上前猛撲鎗礮齊施匪寨負固勢石亂發兵勇受傷多名哨長劉運昌
頭受石傷甚重裹創生擒封甲長夷寨四山吶喊意圖搶奪官軍力戰謬解回營先是東山七甲半地推
總伙頭楊廷貴最爲狡謫封甲長夷寨猛悍是以號召羣夷當二匪被獲時黑勞均有糾衆搶奪情事王
阿路子張營事均充白裸羅伙頭最爲夷衆所信服自蘇倫元攻克二保坪後楊廷貴卽遣人投遞木刻
歸誠又暗向劉銳恆營投順首鼠兩端心懷叵測經該參將等覷破勒令縛獻匪首自贖楊廷貴知計不
行逼得各營夷衆抗拒官軍迫開封甲長被擒其勢已孤欲潛渡波苴河竄往大姚以圖復逞經劉銳恆
派令哨弁李文高跟蹤偵探自率劉萬清等繼進先將該匪目之家屬七丁口全獲楊廷貴避匿洞中亦
被李文高生擒其弟楊老二猶敢糾衆搶劫被就撫之米庫勞參楊來扒用勢將其射傷剽取首級餘匪

四散自封楊二匪被獲後各營深入餘匪散匿七甲半地該處山地遼闊東渡金江卽爲大姚賓川屬地亦多夷民聚居恐被勾結一面飛飭各營分地深入窮搜一面由省調派綏靖左營總兵張樞管帶兩哨練軍前往大姚一帶查緝以防匪黨竄越嗣據前敵稟報搜山各營各有斬獲山內均無匪蹤被獲各寨次第安撫歸業又經翁壽鎮飭派蘇掄元帶隊會同永北同知姜瑞鴻沿途安撫地方一律肅清計蘇掄元劉銳恆先後擒獲匪首封甲長楊廷貴燒姑拔陳姚囉李老四王飄皮等多名逸匪谷老十楊文才谷老三谷老四谷長生王五保逃竄山外亦被梁士偉一軍擒獲此各營分路進剿擒獲匪首封長甲等之實在情形也臣溯查東山九地黑勞步一和曾於道光初年構亂經川滇兩省派兵會剿始獲安輯迄今數十年來生聚日衆各相雄長聲教不通儼同化外幾不知有土司更不知有流官因其蟄伏未出未敢輕議用兵茲幸仰仗 天威將士用命怙惡匪徒殲除殆盡各寨良懦勞步得以各安生業而毗連山水郡縣地方不致時有出掠之虞實爲邊疆大幸以上大概情形曾於五月十五日電請總理各國事務衙門代爲陳奏仰慰 宸廑刻下軍情已竣各營自應分別撤留等電商署提臣蔡標酌留貴河洲一營鎮壓山內並訪緝逸匪其餘李福興馬乘雲馬桂三營均令各回原防蘇掄元原駐武定亦令回防劉銳恆帶隊隨同翁壽鎮俟安撫事竣飭令回省續派張樞兩哨暫俟江邊無事亦回原防所有永北屬舊衙

坪等處新遭匪亂除由翁壽鏡按戶發給賑撫及籽種銀兩俾安排墾外仍飭梁士偉暫留新招練勇二百名分駐彈壓並緝拿漏網匪首王阿路子務獲懲辦以絕根株所有各營先後擒獲首匪楊廷貴封甲長卽洗酒扒張管事熊千金等飭令翁壽鏡親提訊取生供按名正法烏示以昭炯戒惟此次夷匪繼亂旬結勞費寬擾夷地縱橫數百里相持六閱月各員弁先將丁洪濟等悉數就擒不致蔓延鄰境繼將黑勞著名匪目艾除殆盡在事各員尙屬著有微勞請先擇尤酌擬獎勵開單繕懇 恩施永北協同知姜瑞鴻署永北營參將梁士偉身任地方未能先事預防幾成巨患本應參處姑念數月以來隨同各營籌餉籌撫尙能力蓋前愆功過相抵應請免其置議代夫賜職之北勝土知州高鳳坤奉委招撫亂夷爲賊所脅不屈被戕實屬深明大義忠烈可風應請 旨交部從優議恤以慰貞魂其歷次陣亡傷亡之員弁兵勇查明歸案辦理所有在事出力文武官弁兵丁勇丁容傷各營撤回飭令據實開報由臣等詳加覆核再行彙案懇請獎敘 上諭王文韶譚鈞培奏官軍剿夷匪續獲首要地方一律肅清在事出力各員開單請獎一摺雲南東山黑夷頭目丁洪濟谷老四等於上年旬結匪徒妖言惑衆附近夷寨多被脅從經王文韶等調軍剿辦丁洪濟等雖已伏誅匪黨仍屬聚不散總兵馬桂等分道進攻本年三四月間迭次圍剿掃蕩匪巢多處擒獲匪首張管事谷老四燒姑皮封甲長等多名正法殲斃餘匪不記其數客

星寨夷書不反側現在山內均無匪蹤地方一律平靜即著王文韶等督飭地方官將被脅各寨良民妥爲撫綏俾安耕鑿所有單開雲南提督開化鎮總兵蔡標鎮總兵岑有富均著交部從優議敘運西道張廷燊著賞加二品銜候補道翁士鈺著賞戴花翎補用副將提標中軍參將劉銳恆著免補副將以總兵交軍機處記名請旨簡放並賞給捷勇巴圖魯名號儘先補用參將蘇椿元著免補參將以副將留於雲南儘先補用並賞給銳勇巴圖魯名號儘先補用副將貴州羅斛營參將李福興著免補副將以總兵交軍機處記名請旨簡放並賞加提督銜記名總兵元山營參將馬桂著以提督交軍機處記名請旨簡放並賞換奇成額巴圖魯名號記名總兵貴州黎平營參將黃河州著以提督交軍機處記名請旨簡放並賞給從一品封典補用游擊馬梯雲著免補游擊以參將留於雲南儘先補用並賞給綽勇巴圖魯名號並承壽著免補游擊以參將留於雲南儘先補用並賞加總兵銜補用副將李自新著免補副將以總兵交軍機處記名請旨簡放並賞給正二品封典以示獎勵北勝土知州高股坤奉委招撫不屆被賊苦交部從優議卹餘著照所議辦理該部知道軍併發○癸未諭倉場衙門奏拿獲著名土棍請旨交部嚴訊一摺據稱傳米船戶使水私售本地土棍挾制分肥積久相沿殊堪痛恨所有拿獲之棍二汪七等均著交刑部嚴行審訊從重治罪以昭炯戒另片奏此項土棍到案時罪至軍流輒先供親老丁單以

爲留養地步嗣後請飭部實行發遣等語著刑部議奏○以沈恩嘉著刑部左侍郎○甲申諭詳麟奏請
赴海疆軍營報効一摺覽奏具見勇往之忱惟倉場事務繁重該侍郎辦理尙屬認真仍著切實整頓毋
得稍涉疏懈所請從戎海疆之處著毋庸議○繼格入京祝 嘏以興存著廣州將軍○以張春發爲廣
西右江鎮總兵○許振祿奏山東運河道屬夫食不敷擬懇援案借撥登沂道庫河項以資接濟允之○
丙戌 上詣建福宮 孝貞顯皇后聖容前行禮○丁亥劉秉璋奏 臣於光緒十九年十月十三日准戶
部咨議奏白鉛價值內開查寶川局所鑄錢文仍係鑄重一錢二分行令嗣後該省補鑄制錢欽遵光緒
十三年 諭旨每錢一文鑄重一錢等因當即轉行去後茲據布政使王毓藻詳查寶川局鼓鑄制錢
用銅鉛算連各廠嗣老山空產銅短絀全賴另覓鉛廠新礦使鑄白鉛因辦省禁買亦經另採新礦並招
商運赴黔邊收買奏載在案各新礦所採暨黔邊買來銅鉛又會理州白果灣試辦白鉛均係嶺地乾脆
歷經局中剔出低銅低鉛飭商變換純銅純鉛而換運銅鉛仍遠不及老礦純淨天地生物精華所
限非人力所能補救是以近年川省鑄錢約照每錢一文重一錢二分鼓鑄而鑄出之錢質色尙不堅精
擲地卽恐破碎難以經久行使市面不甚通行前奉 諭旨卽飭寶川局照每錢一文鑄重一錢經該局
員呈驗所鑄之錢內係高低難分字跡模糊莫辨重接卽破成數塊實屬不能成錢是以欽奉 諭旨日

久未能遵辦職此之故再三籌度川省鑄錢實難減輕分兩應請仍照每錢一文鑄重一錢二分將來礦
中地氣旺厚所產銅鉛質色純熟再行遵減等情詳請奏咨前來臣覆查該司所詳委係實情合無仰懇
天恩俯念川省現產銅鉛質色甚低如照部議減輕分兩鼓鑄實難遵辦應請照舊每錢一文鑄重一
錢二分俟礦地漸旺銅鉛純淨即行遵減以歸劃一下戶部議奏○戊子裕寬入京祝 綏以劉樹堂署
河南巡撫○以崇禮署禮部尚書○己丑 上詣 奉先殿 壽皇殿行禮○湖南巡撫吳大澂電奏請
統率湘軍赴韓督戰允之○庚寅諭軍機大臣等李鴻章電均悉定購三快船撥款向不敷用著李鴻章
電前調照撥核明實需用款若干再由戶部添撥俄有動兵逐日之意此非我所能阻然亦不可聯彼為
援致他日藉詞要索總爾先由我兵攻剿得勝則俄雖派兵續出亦落我後著李鴻章飭催水陸諸將密
速圖功慎毋虛盼強援轉疏本計○諭御史齊開奏倉場咨調委員宜示限制一摺據稱倉場每年辦理
清務按名咨調委員易開請託之弊請由順天府直隸藩司於屬員中各選擇二十員出具考語咨送倉
場其餘二十五員仍歸倉場自行酌委等語著倉場侍郎會同戶部議奏○諭御史齊開奏各倉滿漢監
督向由戶部咨取各衙門司員引見傳稱率多久不進署及年老衰庸之員請飭認真保送等語監督統
轄一倉責任綦重豈可令冗員濫竽充數嗣後各該衙門堂官務擇誠實可靠之員認真保送如到倉後

不能得力卽由倉場侍郎按名嚴參○命載漪管理神機營事務○調李秉衡爲山東巡撫福潤爲安徽巡撫○辛卯 上詣 奉先殿 壽皇殿行禮○左副都御史薛福成卒予祭葬賞其子知縣薛翼運以知州用○李鴻章電致總理各國事務衙門頃見南洋轉移電 旨嚴禁內地米糧不准出洋固爲斷日接濟起見此由海道情形太生不明彼此大局姑爲是議日向來購運朝鮮及越南米最多實少赴滬運米之事現日船不來滬卽有奸商轉販計亦無幾若我自禁米糧出洋不爲分別曉諭適爲自困軍民之道查產米以長江上下最多如禁出洋則閩廣各省民食無從取給順直連遭災歉每年津運南米二三百萬撥止將斷絕況募添新勇及在防各軍向賴購辦南米以濟軍食飢困可慮應請 旨飭下南洋及滬鎮蕪各關嚴禁奸商販米赴日其由海道轉運南北各省米糧仍准華洋各商船承運由滬關切實稽查斯可困日而不至自困是否有當乞代奏請 旨遵行 上諭軍機大臣等前據李鴻章奏禁米出洋應分別辦理當經電諭劉坤一照辦茲據覆奏擬設法變通凡津商運米取保給照其餘各省關仍遵前旨查禁○癸巳王文韶奏據雲南布政使史念祖詳稱定例滇省地方官經營轉運銅店及委員解運京銅均另行支給養廉銀兩於陸運項下作正造銷誠以承辦要公需用在所必需不使枵腹從事也雲南銅政自經兵燹廢弛同治十三年奏請試辦經營十餘年未見成效光緒十三年前雲南巡撫唐炯奉

命以巡撫銜督辦雲南礦務蒞滇以來竭力整頓躬赴各廠鑿險縫幽餐風觸露乃徧探引苗廣開新硯殫精竭慮艱阻備嘗論其事則與運解一體論其任則綜運解之大綱而一切發展經費尙未議及作何支給在唐炯受 恩深重固未嘗冀倖及茲而自到滇迄今歷有年所縱使儉約不渝自甘菲食而辦公竭蹶日久難支加以每一出巡驗廠與差僕從工食盤用一切雜費勢不能無念祖職司鈔務出入知之已深未敢再安緘默查近年閩省添設船政大臣及出使外洋各員均各優給俸薪並有另給經費督辦礦務雖非出使外洋可比而與督辦船政情事相同第船政章程滇中無案可考可否援照雲南巡撫奏廉支給一半銀五千兩免扣減成茲查礦務衙門並無標轄一切差官弁役薪工口食均須自募自籌可否按月准給經費銀二百兩俾得驅策有資藉收指臂之效而與運解京銅例意亦屬相符此項銀兩如蒙 聖准應請自到滇日起按月支給於銅本廠務項下作正造銷等情詳請具奏前來 臣維制祿爲有國常經養廉尤我 朝曠典前撫 唐炯蒙 恩特派督辦礦務數年以來整理舊廠開闢新場然費經營似因實創 臣於到任後體察地方情形摺內奏陳在案現在各廠漸有起色京運得以接濟雖唐炯遜 恩格外艱苦亦所不辭惟念 聖朝體恤臣僚不使人有難言之隱 臣等仰體 德意既有可循之例未敢遽於上聞可否准如該藩司所請 賞給督辦礦務養廉銀兩及各項薪工口食經費著爲定章之處

應請 敕部核擬施行下戶部議奏○乙未朝鮮平安道閔丙峒等來電奉我國王憲電敕呈中堂敝邦
運否有臣叛謀與倭醢釀殺制存革罪犯 天朝現今危急迫在呼吸轉奏 天恩克復宗社以救生靈
千萬祈祝立復朝鮮國王由李鴻章轉電總理各國事務衙門代奏 上諭軍機大臣等朝鮮恪守職貢
垂三百年休戚相關爲各國所共悉前者倭託名護館遽遣大兵覬覬該國都城陽以自主相要陰懷狡
謀臣測過奪政柄肆行欺壓朝廷不忍坐視遣兵防護詎倭乘我不備首開衅端並與擊請剿土匪各營
變詐情形實出意外因卽撤使絕交昨發大兵進剿前軍已抵平壤各直省雄師亦克期繼發今據該國
王轉奏有昨臣附倭醢釀請罪乞援等情極爲軫念已轉飭前後各軍迅卽齊集合力奮擊務期殄除惡
氛以圖恢復決不容倭人僞處東土著李鴻章電知閔丙峒俾諭該國王知之○諭軍機大臣等前湖北
提督程文炳應否令其赴津帶營助剿著李鴻章熟籌具奏○丙申以崇徵署烏里雅蘇臺將軍○丁酉
兩○命侍衛壽長馳赴黑龍江軍營交依克唐阿差遣委用○諭軍機大臣等葉志超一軍前據電稱已
抵平康俟軍移何處再與等語現在是否合軍平壤抑另紮平壤就近處所著李鴻章電飭查探覆奏○
己亥 上諭 大高殿祈雨○諭軍機大臣等照奏購辦智利快船需價若干製造是否精良行走能
否迅速務須切實考核再行商購因其船並非鐵甲又值居奇之時價必增貴若但據經手洋人誇飾之

詞徒糜庫款無補實用殊屬不值著李鴻章電知劉照發妥慎辦理並將所報之價先行電覆○諭軍機大臣等現在駐紮平壤各軍爲數較多亟須派員總統以一事權直隸提督葉志超戰功夙著堅忍耐勞卽著派爲總統督率諸軍相機進剿所有一切事宜仍隨時電商李鴻章妥籌辦理○庚子諭前因葉志超一軍與倭人接仗獲勝仰荷 慈恩頒賞銀二萬兩以示鼓勵嗣據電奏該軍暫移公州而倭兵二萬餘人突來圍勢我軍奮勇對敵鏖戰六時之久倭兵死者千七百餘人我軍傷亡三百餘人該提督等以衆寡懸殊設計退敵遂率兵東渡海江暫駐平壤自請嚴議並請將出力及陣亡將弁勇丁分別獎卹等語葉志超一軍本爲朝鮮定亂兵數不多此次途遇倭軍數倍於我國合攻環卒能以少擊衆全師而出雖有傷亡功過足以相抵所請嚴議之處著加恩免該軍將弁冒暑苦戰奮勇出力深堪嘉尚著准其擇尤奏保陣亡弁勇卽著查明請卹現在該提督已抵平壤與大軍相合卽著統率諸將協力進剿迅奏膚功以慰股盼○松椿入京祝 嘏以鄧華熙著暫違題旨○辛丑 上諭 大高殿報謝○諭軍機大臣等現在倭船屢窺海口海軍防剿統將亟須得人丁汝昌畏葸無能巧滑避敵難勝統帶之任嚴諭李鴻章於海軍將領中遴選可勝統帶之員於日內擬奏不得再以臨敵易將接替無人等詞曲爲迴護致誤大局○壬寅諭李鴻章電奏據葉志超電稱六月二十五日在城歡地方接仗倭兵死亡甚衆嗣移軍

經過濟州忠州金化遇有倭兵攔截皆經擊退全軍現抵平壤查明出力文武並陣亡各員請分別獎卹等語此次葉志超督軍力戰以少擊衆自六月二十七日以後迭次殲斃倭兵不下五千餘人該軍將弁奮勇禦敵異常出力自應優加獎敘記名提督山西大同鎮總兵張士成著賞給剛勇巴圖魯名號記名提督江自康著賞穿黃馬褂記名總兵譚清遠提督銜記名總兵葉玉標均著以提督總兵交軍機處記名遇缺請旨簡放並賞給威勇巴圖魯名號總兵銜儘先參將許兆貴著免補參將以副將儘先補用並賞給健勇巴圖魯名號副將銜儘先遊擊魏家訓毛殿鳳孫禮達蕭鵬程均著免補參將遊擊以副將儘先補用魏家訓並賞給直勇巴圖魯名號毛殿鳳並賞給利勇巴圖魯名號升用遊擊儘先都司徐照德戴長榮均著免補遊擊以參將儘先補用候補都司儘先守備鮑俊卿王臣均著免補都司以遊擊儘先補用徐照德戴長榮鮑俊卿王臣均著賞加副將銜候選道吳學廉著以道員分發省分歸候補班儘先補用並賞加布政司銜鹽運使銜江蘇候補知府張雪錦著免補本班以道員仍歸原省歸候補班前充補用並賞戴花翎藍翎同知銜分省補用知縣劉長英著免補本班以同知仍留原省歸候補班儘先補用並賞換花翎揀選知縣金慶慈著免選本班以直隸州分發省分歸候補班儘先補用劉長英金慶慈均著賞加

知府銜候選同知史雲龍著免選本班以知府分發省分歸候補班儘先補用藍翎江蘇儘先補用知縣范汝康著免補知縣以同知仍留原省歸候補班儘先補用藍翎升用知縣候選縣丞任家祐著以知縣分發省分歸候補班儘先補用並賞加同知銜史雲龍范汝康任家祐均著賞戴花翎其餘出力員弁兵勇准其彙案請獎陣亡之副將李大本遊擊吳天培王國祐均著照總兵例議卹守備關起龍著照參將例從優議卹千總許義友李玉祥均著照都司例議卹此外陣亡員弁兵勇著俟查明再行請卹葉志超督師禦敵能使將士用命力挫兇鋒前據自請嚴議獎勵經加恩寬免著再賞給白玉翎管一枝小刀一柄大荷包一對火鏢一把以示優異仍著該提督督飭各軍相機進剿迅奏膚功源廣懋賞該部知道○諭軍機大臣等吳大澂電奏均悉卽著趕緊馳抵威海與李鴻章籌商進止湖南巡撫著王夔暫行護理○命兵部尙書敬信工部左侍郎汪鳴鑾在總理各國事務衙門行走○癸卯諭朕欽奉 慈禧端佑康頤昭豫莊誠壽恭欽獻皇太后懿旨現在大兵進駐平壤各軍將士冒暑遠征備嘗艱苦恐因水土不服致生疾病深宵軫念殊殷著發去平安丹四十匣山李鴻章祇領速遞葉志超軍營頒給各軍將士以示體恤欽此卽著李鴻章欽遵辦理○諭軍機大臣等據李鴻章電稱葉志超因病懇請開缺就醫復懇收回成命另派總統等語葉志超孤軍禦敵冒險出國督率有方堪勝總統之任現雖暫時患病著毋庸開缺

在營安心調理一俟痊愈卽統率全軍合力進剿無許固辭○甲辰諭軍機大臣等前據張之洞奏保總兵張春發潛滋曾在廣西立功當諭李瀚章傳令該二員募勇北上茲據李瀚章電稱南勇不宜於北路遠難於運到北洋凍阻後南洋喫緊或令酌帶親軍餉械赴津聽候派營給管等語著李鴻章酌量情形應否飭令該二員來津調遣之處卽行電覆

八月丙午諭軍機大臣等吳大澂電已悉該撫到威海後一切進止應候旨遵行何得率行督軍出海至前此張曜督辦海軍係奉 懿旨特派並無總署委派之事該撫竟自行陳請殊屬冒昧著傳旨申飭○以李文田署工部右侍郎仍在南書房行走○丁未祭先師孔子廟上親詣行禮○諭軍機大臣等聞照境所購阿模士輪船議定包送各費卽著李鴻章電飭照所議辦理趕早暢行祇魯兵輪行駛遲緩著毋庸議○戊申上詣社稷壇行禮○己酉以文全爲黑龍江副都統○前甘肅新疆巡撫劉錦棠卒予祭葬建祠事蹟交國史館立傳賞其子劉道淵員外郎劉鵬烈舉人孫劉家璠主事等予諡襄勤○庚戌諭謙光奏本月初五日經東華門值班委護軍參領福保拿獲內務府正黃旗閒散于德立包裏銅磚入城首語支離請飭部審訊一摺于德立著交刑部嚴行審訊按律懲辦○辛亥諭軍機大臣等葉志超前在牙山兵少敵衆詞氣頗壯今歸大軍後一切進止似有窒礙爲難曠士成打仗勇往今忽擬

回直募勇難保不另有別情葉志超與盛毅諸將平日分屬等夷今應總統同人中或存意見不服調度則措置必難自如軍情緊迫之時深慮因此憤事現敵氛已逼所有分布進剿機宜著妥籌具奏不得以兵未全到束手待敵來攻士成募勇儘可遣員弁代辦何必自行著仍留營剿賊如已起程亦電令速回無庸來直○諭軍機大臣等李鴻章議購魚雷獵船抵清單內開行程頗速價亦合宜著即於匯豐現存之二十萬磅內購買四隻其每點鐘能行二十八邁當之說究竟能如所言否應如何試行驗看購船係由何人經手是否即在德國購定現在各國禁船出口運送有無阻滯均著李鴻章詳細籌畫迅即電覆○諭裕祿奏河南廣城縣衙門於本年二月間該縣因公赴府被賊擁入署內行劫拒傷家丁李希賢等身死當經拿獲從犯二名其餘首夥各犯在逃未獲請將疏防員弁摘頂勒緝等語衙署重地竟有匪徒行劫拒捕傷人之事該地方文武平日抽務廢弛已可概見著廣城縣事候補知縣孔憲恂與城縣城守營千總胡幽凌緝均著摘去頂戴勒限兩箇月嚴緝逸犯務獲究辦孔憲恂現已卸任著留於地方協同接任官緝拿倘限滿無獲即行從嚴參辦該部知道○癸丑命侍衛鍾祺馳赴依克唐阿軍營聽候差委侍衛陳國鑑馳赴葉志超軍營聽候差委○戶部奏海防喫緊需餉浩繁前經臣部於北洋大臣李鴻章奏請募勇購船各案內撥銀二百五十萬兩嗣又酌擬籌餉四條約可提挪銀四百萬兩並聲明續有

所見應由臣部奏明辦理各在案伏查近年以來幣藏偶有不敷往往恩借洋款多論磅價折耗實多因思中華之大富商巨賈豈無急公慕義之人若以恩借洋款之法施諸中國商人但使誠信允孚自亦樂於從事當即據派廉幹司員招集京城銀號票號各商等取稱食毛踐土具有天良朝廷現有要需敢不竭力設措臣等竊謂該商此舉實開風氣之先既宜體恤下情尤當昭示大信謹酌擬辦法章程六條繕具清單恭呈 御覽如蒙 俞允應由臣等飭令派出司員即向該商定借銀一百萬兩備充餉項一預定還期查從前借用洋款隨還限期或六年八年不等分作兩期按期付給今擬援照成案略為變通分限兩年半以六箇月為一期第一期還利不還本自第二期起本利併還每期還本四分之一已還本銀若干利即遞減定以五期還清所定期限先於印票內標明不得稍違時日一酌給利息查從前借用洋款悉以七釐八釐為息今借用商款自應照給利息以示體恤此次酌定七釐行息一年按十二箇月敷計過箇照加較諸洋款行息有減無增一頒發印票查借用商款必應發給印票俾得執以為憑所有商鋪字號本恩數目交兌日期均須一一填寫鈐用戶部堂印每屆一期無論還本還利皆於票內註明還清之後將票交銷此外再給五期小票每還一期即撤一票並由臣部設立登記印簿以憑稽考一定準平色查借用洋款以磅價合銀每過歸還之期磅價驟昂以致異常折耗茲擬借用商款概以庫平足

色紋銀交納將來亦以庫平足色紋銀歸還一出入平色劃一自無兩歧之弊一撥抵款項查臣等創
議凡借商款概不由庫出入以期緘去煩苛此次所借商號銀兩若由部庫兌收驗看成色較對平砵未
免多費周折現查內務府有應領部款數在百萬以外擬將各商應交之一百萬兩撥歸銀號轉交內務
府支領抵作部庫應發之銀款部庫卽於應發內務府款內如數提出作為收到該商交項留充餉需將
來歸還本利之時如各該票號有匯到外省京餉等項卽准其赴部呈明照數扣抵倘匯不敷卽行將款
放給不使稍有分毫賠累一嚴防弊端查此次借用商款本屬創舉臣等遴派廉幹司員認真經理一切
事宜不假吏胥之手收交項款並無絲毫規費不致擾累商人惟防弊之道不可不嚴臣等當密加訪
並令派出司員隨時查察如有吏役在外招搖立即飭拿嚴究並俾知該商遇有前項情事准其赴部控
呈以憑懲辦再思借商款京城已經創辦各省省會關埠等處或紳富聚居或商賈輻輳該地方官果能
實力勸諭妥立章程必有聞風而起者擬請 飭諭各省督撫徧諭官紳商民人等如有湊集資本情願
借給官用者准赴藩司關道衙門呈明照章衙門辦法議定行惠填給印票其票以一百兩為一張鈐用
藩司關道印信填明歸還本利限期准於地丁關稅內照數按期歸還不得絲毫掛欠如集款至一萬兩
以上並將籌款之人先行請獎給以虛銜 封典以示鼓勵是否有當伏候 聖裁所有各省官紳商民

如有湊集資本情願借給官用者准照本部辦法議定行惠填給印票並將籌辦之人給獎 上諭戶部奏請飭各省恩借商銀等語現在倭氛不靖購辦軍需需餉浩繁恩借商款京城業經創辦卽著各直省督撫備諭官紳商民人等如有湊集資本情願借給官用者准赴藩司關道衙門呈明卽照戶部辦法議定行惠填給印票其票鈐用藩司關道印信填明歸還本利限期准於地丁關稅項下照數按期歸還不得絲毫掛欠如集款至一萬兩以上准將籌集之人先行請獎虛銜封典以示鼓勵此舉係屬創辦尤須各督撫力矢公忠督率屬僚示人以信收發之際務須嚴禁需索留難抑勒諸弊有犯立予嚴懲各商民具有天良但使本恩無虧當無不踴躍從事也○甲寅 上諭 奉先殿 壽皇殿行禮○諭前因御史鄭思微奏參河南按察使長祿並署開封府南陽府知府濮文選似法營私養奸縱盜各節當諭令許振祿按款確查茲據查明摺奏河南按察使長祿原參性耽逸傲縱容盜賊信任家丁濫收餽贈各款均經查明尚無實據惟於家丁袁茂臣挾妓賣娼失於督察究屬疏忽長祿著交部議處署開封府南陽府知府濮文選結案極多能任勞苦並無收受賚敬姑息養奸情弊會匪刁老八由其拿獲稟請永遠監禁亦無釋放之事卽著毋庸置議餘著照所議辦理該部知道○乙卯端良奏查革員張佩綸歷年在福建馬尾領事之後荷蒙 天恩不加重誅僅予發遣及至釋回該革員投在大學士直隸督臣李鴻章門下爲

司文案營務等處筆札李鴻章以女妻之近聞復令在電報館總理事務張佩綸自恃其才往往將電奏電報文字隨意改寫道府提鎮文武各官爲係督臣至親孽相側目莫敢有言竊維士貴品行而後學問李鴻章統屬北洋之大何患無才而必用一品行有虧之人日在左右不特爲諸將掣肘抑且爲外國所笑奴才心實恥之可否請 旨飭下直隸督臣李鴻章將該革員張佩綸令回籍俾免受其毀蔽以致貽誤事機出自 宸斷奴才職司糾彈既有所聞不敢安於緘默 上諭御史端良奏請將革員張令回籍以免貽誤事機等語革員張佩綸獲咎甚重事干發遣釋回後又在李鴻章署中干預公事屢招物議竊屬不安本分著李鴻章卽行舉令回籍毋許逗遛○諭軍機大臣等張之洞電奏據魏光燾呈稱遵旨趕於長沙一帶招集劉錦棠舊部刻期成軍惟丁憂未滿三年懇請終制等語現在軍務緊急該藩司籲懇終制礙難准行惟現招湘勇已不爲少所請募成十營爲數較多著挑選精銳敢戰之卒共募六營已飭戶部籌撥的餉到直後由李鴻章撥給子藥該藩司接奉此旨卽迅速帶勇北上不得稍涉延緩○命道員春順員外郎壽山侍衛黃權黃山馳赴依克唐阿軍營聽候差委○丙辰諭本月十五日恭上 慈禧端佑康頤昭豫莊誠壽恭欽獻皇太后徽號朕奉 慈禧十四日皇帝親進奏摺十五日親進表文該衙門敬謹預備○諭本月十五日恭上 慈禧端佑康頤昭豫莊誠壽恭欽獻皇太后徽號所有御前

大臣大學士禮部堂官太常寺鴻臚寺等官著於十三日辰刻在慈寧門先行演禮一次均穿蟒袍補褂
○電 諭李鴻章飭查軍械局鎗械子藥用銷各款是否相符有無竄敗不堪應用據實覆奏○丁巳諭
軍機大臣等衛汝貴恒怯無能性情卑鄙平日尅扣軍餉不得軍心沿途騷擾必至敗事著李鴻章查明
嚴參○諭朕御用馬匹理宜敬慎豫備歷經詔令上駟院認真餵養乃多不堪乘騎者總由該堂官等漫
不經心所致著上駟院堂官督飭牧長廐長嗣後加意餵養務須一律贍壯如仍前怠玩以致不堪乘用
定將該牧長廐長等從重懲辦該管堂司各官一併懲處不貸懷之○剛毅奏會同樂會海陽等縣遭風
被水情形得 旨據奏會同等縣遭風被水情形較重著卽飭派委員前往勘明分別撫恤毋任失所○
戊午 上御中和殿閱視奏書詣 慈寧宮進奏書○己未 上御太和殿閱視表文詣 慈寧宮恭進
冊 寶上 慈禧端佑康頤昭豫莊誠壽恭欽獻崇熙皇太后徽號曰 慈禧端佑康頤昭豫莊誠壽恭欽
獻崇熙皇太后禮成頒詔天下覃恩有差○庚申 上御太和殿受賀○壬戌諭倭人渝盟聲勢迫脅朝
鮮朝廷容念藩封興師致討北洋大臣李鴻章總統師于統籌全局是其專責乃未能迅赴戎機以致日
久無功殊負委任著拔去三眼花翎褫去黃馬褂以示懲儆該大臣務當力圖振作督催各路將領實力
追剿以順前愆○諭壽耆等奏拿獲出柵串號之士子請交部審辦一摺周秉義傳光臨著卽送交刑部

將辦另片奏請將贖大妄爲之文生長海周世昌二名卽行斥革等語長海周世昌均著卽行斥革長海
情節較重著交刑部審訊按律從嚴懲辦○諭前據御史安維峻奏參甘肅河州捐建已故總兵沈玉遂
專祠按畝加徵已故提督周達武剿辦會匪殃及無辜道員關兆熊總辦營務任意索詐各節當經諭令
鹿傳霖確切查奏茲據查明覆奏河州捐建沈玉遂專祠地方文武各官暨各營弁兵所捐十居其七民
間係量力酌捐爲數無多並無按畝加徵鞭扑比追之事現在祠已竣工卽著無庸撤議都司黃福廷經
理修祠剛愎自用致招怨言著以守備降補已故提督周達武前辦高靈縣會匪接據稟報卽派兵前往
剿滅地方賴以乂安辦理迅速不爲無功當時營縣並非捏報至派往剿弁未能約束兵丁雖當時業經
督臣參奏該故提督未在执行惟事後未卽查參其過亦不可掩著仍遵前旨准其於立功省分建立專
祠毋庸予諡參將現署肅州鎮總兵劉得勝奉派剿匪不能約束兵丁實難辭咎著交部議處候補道陶
兆熊委辦營務雖無苛索確據惟氣質粗莽難勝監司之任該員起家戎行前在軍中尙稱勇敢著以副
將改用該部知道○福州將軍希元卒予祭葬准入城治喪賞其子世樞主事○癸亥以慶裕爲福州將
軍崇禮爲熱河都統○甲子諭壽耆等奏請將遺失試卷之受卷官交部查議一摺受卷官刑部主事王
學伊等於第三場受卷時因人多擁擠以致遺失士子張慶雲遺失祖試卷二本雖據自行檢舉究屬疏

忽刑部主事王學伊光祿寺署正謝汝展均著交部照例查議餘依議該部知道○以壽昌爲左副都御史興安爲成都副都統○乙丑李鴻章電致總理各國事務衙門今早由驛遞摺頃始接裁州轉葉志超安州來電曰迄自十四午刻繞竄順安後於平壤四面山頭安大小礮百餘尊是日卽四面來攻鎗礮並發各將領均奮力分道迎剿起亦懸賞如將日兵擊退者賞銀三萬奪礮一尊賞銀千兩生擒六十兩取首級三十兩鎗刀馬均列賞各統將又另自加賞比派衛馬兩軍將江東之賊擊退馬玉崑奪礮七尊又由江東縣北路渡來大股及成川之賊同時來攻江自康營超與左寶嶺盟陞阿親督數千人同懸重賞設伏夾攻至晚日勢始弱各軍奮力奮追生擒及割取首級二百餘名我軍共傷亡三百餘人日由龍岡西北分道來攻盛軍各營壘該軍先山衝汝貴調去五成隊過江奸細探知實情卽來猛攻數次不下超恐孫顯賢在外游擊不能兼顧比調衛汝貴整隊回擊日始敗退我軍傷數百人十五丑刻日大隊越山而來各將領各分一段堅守以待又挑選精銳兵勇游剿日兵死進不退兩軍對施鎗礮連夜達旦至十六早仍四面來攻愈急該城北原有奉軍三營礮臺連日被其打燬日換班三四次意在直撲北城左寶貴忠勇奮發力疾親督三營並諸將迎頭血戰日抵敵不住始退乃左鎮忽胸中鎗傷陣亡甫收隊回城而日漸又逼近各軍子盡糧完死戰滿壕者不忍目視兼四山大礮齊向城營施放兵勇無地立足祇

得且戰且退經過仁川一帶日卡數十處層層打出文武官弁兵勇陣亡無從確查十八早到安州日竟
退出百餘里始退勢必跟蹤齊進若山安州堵擊無險可扼實不容易超會商衛汝貴馬玉崑陞陞阿等
先拔隊過安州清川博川兩江之間分別整頓休息超督盛軍步隊二營奉軍步隊一營奉天盛字馬步
五營在博川登江固守一面調呂本元劉盛休前來擇要駐扼候各軍整頓有緒再相機進止此次各軍
陣亡文武員弁甚多容查明請卹超調度無方乞奏請嚴議處治等情查記名提督高州鎮總兵左寶貴
奮勇血戰中鎗陣亡應請 旨照提督例從優議卹並於各省立功地方建立專祠可否 予諡伏候
恩施總統各軍直隸提督葉志超統領盛軍寧夏鎮總兵衛汝貴統領毅軍記名提督馬玉崑御前侍衛
副都統陞陞阿雖因子盡糧絕退出平壤實有應得之咎應如何分別懲處並候 聖裁請代奏 上諭
軍機大臣等李鴻章電奏十四五等日平壤接戰情形均悉左寶貴力戰陣亡殊堪憫惻所有此次應行
賜卹請處各員著李鴻章專摺馳奏再降諭旨各軍現在暫紮安州之北軍糧子藥俱盡著李鴻章迅速
運解源源接濟不得再有缺乏葉志超現擬調呂本元劉盛休前往惟昨因日人有圖窺義州之信特令
劉盛休帶銘軍四千暫駐義州與聶士成呂本元共籌防剿日人現以抄襲後路爲得計平壤大兵既退
日乘機內窺尤在意中葉軍固須在前嚴防而後路之防更要劉盛休著仍先駐義州與葉志超通籌戰

守事宜不得稍有疏失至葉志超等軍現在寶存若干名並著查明覆奏○以啟秀爲理藩院尙書陸
爲盛京兵部侍郎○丙寅諭朕欽奉 慈禧端佑康頤昭豫莊誠壽恭欽獻崇熙皇太后懿旨現當用兵
之際必應寬備餉需除飭戶部隨時指撥外著由宮中節省項下發去內帑銀三百萬兩交戶部陸續撥
用以收士飽馬騰之效前敵軍營需用制錢並由內發給京錢二萬串由戶部解交李鴻章迅即運往應
用欽此著該部欽遵辦理○諭慶親王奕劻奏請統帶勁旅出關往剿一摺具見忠愛勇往之忱甚屬可
嘉惟該親王總理海軍兼管各項差使責任綦重且夙夜在公趨承左右未便遽赴軍營著毋庸議○李
鴻章電致總理各國事務衙門提督丁汝昌電稱十八日與日接仗昌上望臺督戰爲日船排礮將定遠
望臺打壞昌左脚夾於鐵木之中身不能動隨被礮火將衣焚燒雖爲水手將衣撕去而右邊頭面以及
頸項皆被燒傷彼時爲人擡下不覺過重現在頭脚皆腫兩耳流血水兩眼不能睜開日流黃水脚日見
腫皮肉發黑疼痛異常言語稍多心卽搖擺不甯無能自主請於兩鎮中飭一人暫行代理昌傷稍愈再
行辦事等語查丁提督受傷後傷發腫痛難支自係實情海軍右翼總兵劉步蟾經此戰陣稍有閱歷可
否准令暫行代理全軍事務俟提督傷愈再照常辦事候 旨遵行請轉奏 上諭軍機大臣等丁汝昌
現患傷病海軍提督著劉步蟾暫行代理丁汝昌趕緊調治一俟稍痊仍行接統○李鴻章電致總理各

國事務衙門頃據裕將軍電轉據金州連副都統電稱旅順爲北洋門戶宋慶駐紮多年其得民心現因全軍開拔民心惶惶且門戶空虛日船海面游弋於北洋防務關係非輕再查銘軍十一營現換懷軍六營尙未到齊毅軍若再開拔旅海防務均空北洋水師業已開仗倘日人乘虛實爲可慮令電商奏留宋慶仍鎮旅順等情查現在平壤不守日勢披猖宋軍門奉 旨進紮九連城一帶會同防剿自應迅赴戎機惟既據該處守土官有此陳請未便殲於轉達其旅海海防如何留兵駐守自己妥籌周顧乞電示飭知以定金復人心云鴻查趙懷業新募六營原紮大連灣不日可齊旅順兵力本單口隘過多現雖添調姜桂題程允和新募七營前往替宋慶之防惟宋慶老成宿望軍民協和若仍留督防自屬相宜可否飭劉盛休駐九連城一帶與派出旗營聯絡嚴防鴨綠江窺越之路留宋慶仍駐旅順敬候電 旨飭遵請代奏 上諭軍機大臣等李鴻章電奏均悉昨令宋慶帶所部四營駐紮九連城與銘軍固守沿江一帶本日已降旨派宋慶幫辦北洋軍務現在奉邊緊急勢難專顧旅順一隅仍著宋慶一面派員招募一面先行馳赴九連城布置防守旅順既有姜桂題等軍原紮著李鴻章飭令認真固守勿稍鬆動九連城爲奉省門戶既據李鴻章電稱該處防兵太單銘軍若在鴨綠江西岸防守於大局有益等語著卽責成劉盛休督率所部卽在沿江一帶認真嚴防勿任賊蹤窺越該州屏蔽奉邊僅隔一江又爲前敵各軍轉運

之所該處兵亦無多日人慣用抄截後路之術勢亦可危葉志超等軍日內有無戰事若以大隊回顧議州背水扼紮能否足遏寇氣倘量度賊勢過衆不能操退敵之勝算與其株守孤軍不若全軍先回江西於九連城一帶合力嚴防先立於不敗之地一俟各路征調之軍到齊再圖進剿著李鴻章統籌進止機宜妥爲調度朝廷不爲遙制○命四川提督宋慶幫辦北洋軍務○丁卯 上諭 奉先殿 壽皇殿行禮○諭軍機大臣等現在倭夷狡謀日甚我軍須步步嚴防穩慎進取安設糧臺處所爲前敵各軍命脈所關尤應詳加審擇刻下義州情形既不足恃究以改設何處爲宜著李鴻章妥爲籌畫妥明辦理具司周設道員袁世凱現抵何處著一併奏聞○諭軍機大臣等自平壤各軍退後邊防益形喫緊前經降旨令依克唐阿宋慶馳赴九連城一帶駐紮卽著星速前進妥籌防剿毋得稍有延誤宋慶何日起程著先行電覆用慰廑系○諭軍機大臣等戶部奏餉需緊要擬數條請旨遵行一摺嗣後頗緞兩庫折價著照成案再減一成均按四成實銀開放以昭撙節至典當各商捐輸茶葉糖斤加盤土藥行店捐輸各案均著照所請行該將軍督撫等務宜共體時艱認真舉辦嚴飭所屬妥慎經理如有胥吏藉端勒索不肖之員從中舞弊卽行從嚴參辦毋稍寬縱原摺均著鈔給閱看將此各諭令知之○諭軍機大臣等戶部奏籌撥甘肅新餉一摺甘肅關內外各軍餉銀關係緊要現經該部將光緒二十一年新餉查照上屆所

撥銀數於各省關指撥請飭依限報解等語著該撫嚴飭司道按照單開數目於本年十二月底趕解三成至來年四月底再解三成其餘統限九月底解清○諭本日步軍統領衙門帶領引見請補武職官員甚多斷非一日所出之缺日久積壓殊屬非是嗣後該衙門遇有應行請補之缺卽著隨時帶領引見毋再延緩此外各衙門員缺均當隨時帶領以重職守○諭戶部三庫奏湖南省解到京餉撥雜黑鉛請飭查究補交一摺此次部庫兌收湖南省解到京餉銀內竟有撥雜黑鉛情弊著湖南巡撫飭將短交銀兩卽行補解並查取藩司職名咨部議處一面傳經手官吏查究懲辦嗣後各省委解京餉銀兩均應嚴定章程務除撥雜之弊以重庫款○轉崇光爲吏部左侍郎以長萃爲吏部右侍郎○命御前侍衛公桂祥統帶馬步各營赴山海關一帶駐紮○命鳳鳴查勘 東西陵工程○戊辰夕 月於西郊道凱奏恭代行禮○予朝鮮陣亡總兵左寶貴祭葬世職建祠入祀昭忠祠戰績交國史館立傳○以呂本元爲四川重慶鎮總兵○李鴻章電致總理各國事務衙門葉提督二十二電奉電 旨飭超暫紮安州北面查各軍傷亡太多軍裝不全子藥俱罄須至義州補放營哨官重加整頓萬不能紮在安州一帶徒誤前敵大局俟各軍整齊後再行相機前進此係實在情形不敢含糊誤事云鴻查各軍前運到餉米子藥均因十四日以後前途梗阻車馬星散無法轉運潰退兵勇軍裝缺乏不能不就糧藥於義州收束整頓藉以

固扼後路乞代奏又電致總理各國事務衙門呂本元十九嘉山來電十八日遵電諭由嘉山郡派馬隊
右後兩營馳回義州巡防本元率正前左三營趨赴納青亭與葉提督銜鎮晤面後自帶百餘騎馳往安
州察看情形接護散勇並派博川江渡船連擁潰兵該弁一路狼狽而來見馬隊來接方稍心定葉總
統嗣仍回嘉山郡暫駐以壯士卒之膽而防追兵沿途山路崎嶇兼無米糧銜鎮帶卑前營隊伍前行截
收潰兵葉總統攜帶部數十騎沿途撫卹本元自行殿後惟各軍潰圍而出心甚惶惶西路臨平壤之
漢川水陸可以到義東路由元山到義不過數程再由後而海道抄過鴨綠江趁我軍心未定三路夾攻
誠恐難以抵禦計二十二葉術當可抵義 上諭軍機大臣等李鴻章奏葉志超呂本元兩電均悉倭現
以全力專注義州昨經降旨令葉志超等量度賊勢渡回江西於九連城一帶嚴防又迭催宋慶依克唐
阿赴九連城合力防剿本日據奏情形義州勢難停頓即著飭葉志超等軍分起過江擇要駐紮與劉盛
休呂本元聶士成等及秦省所派之張錫鑾耿鳳鳴各營協力同心分扼上下游各要隘勿令一人偷渡
如遇敵人猛撲各營不分畛域奮勇齊擊並著嚴懲賞格遇有斬級奪械者卽分別優賞不得稍有退縮
致干軍法義州所有糧餉軍火儘量速運回九連城一俟我軍士卒餉械全數過江卽將江內所有船隻
一律撤歸西岸分兵駐守以防搶渡是爲至要昨飭定安裕祿添兵赴江口一帶嚴防並著迅速覆奏○

諭軍機大臣等李鴻章電奏許景澄所購鎗礮諸糧撥四十萬馬克等語著電飭江海關道如數覈算銀兩於出使經費內墊撥電匯並由該道先行電知許景澄爲要○諭劉坤一奏營勇捉船供差刀傷考生請將營哨各官分別懲處等語據稱八月初七日華亭縣附生錢景嵩等僱坐民船來省鄉試行至下關北河口地方遇營勇等人聲稱捉船供差該營勇等竟敢上船逞兇刀傷附生張邦雙廩生潘炳辰增生陸元達二人查無下落請飭嚴究等情營哨各官有管束兵丁之責乃竟任令橫行致有持刀傷人之案成何事體所有營左營營官記名總兵李運春哨官候補守備朱克齊均著卽行革職候補道陳乃瀚亦難辭辦理不善之咎著交部議處其滋事勇丁卽著嚴行訊明按照軍法懲辦餘依議嗣後新募營勇較多該管官弁尤須嚴加約束毋得恃衆滋事致干軍律該部知道○李鴻章電致總理各國事務衙門前飭丁汝昌查明海軍接仗詳細情形頃據電稱十八與日開戰兩時礮煙迷漫各船難以分清現逐細查明當酣戰時自致遠衝鋒礮沈後濟遠管帶方伯謙首先逃回各船觀望星散日船分隊追趕濟遠不及折回將經遠攔截礮沈餘船復回歸隊超勇艙內被敵礮擊入火起駛至淺處焚沒揚威艙內火起又爲濟遠攔腰礮壞亦駛至淺處焚沒查戰時定遠鎮遠艙內亦爲敵彈炸燒一面救火一面抵敵皆無失事超揚若不駛至淺處火卽可救經遠同致遠一樣營勇推敵開自該管帶等中礮陣亡船力離隊如仍緊

隨不散火亦可救廣甲管帶吳敬榮隨濟遠逃至三山島東擱礁連日派船往拖難以出險現用駁船先取礮位再不再浮起只得用藥轟毀竊自日寇起衅以來昌屢次傳令諄諄告誡謂日人船礮皆快我軍必須整隊攻擊萬不可離免被敵人所算此次來遠靖遠如不歸隊定鎮亦難保全乃極速首先退避將隊伍率亂廣甲隨逃若不嚴行參辦將來無以警效尤而期振作餘船請暫免參定遠鎮遠異常苦戰自昌受傷後劉鎮步蟾尤為出力所有員弁兵勇及各船陣亡受傷者容查明稟請奏加獎卹先此電覆等語查十九升刻濟遠先回旅據船頭轟裂漏水礮均不能施放情有可疑茲據丁汝昌查明致遠擊沈後該管帶方伯謙即先逃走實屬臨陣退縮應請旨將該副將即行正法以肅軍紀廣甲管帶澄海營守備吳敬榮亦隨濟遠逃至中途擱礁咎有應得惟人尚明白可造可否革職留營以觀後效乞代奏上諭軍機大臣等李鴻章電奏查明海軍接仗詳細情形本月十八日開戰時自致遠衝鋒擊沈後濟遠管帶副將方伯謙首先逃走致將船伍率亂實屬臨陣退縮著即行正法廣甲管帶守備吳敬榮隨濟遠退至中途擱礁著革職留營以觀後效○已已命已革福建臺灣布政使于蔭霖馳赴依克唐阿軍營聽候差委○以余虎恩為廣東高州鎮總兵○諭軍機大臣等現在山海關一帶防務喫緊著李鴻章傳知吳大澂統帶所部勇營駐紮樂亭嚴加扼守其全隊何時到威卽日電覆○庚午諭朕欽奉 慈禧端佑康

願昭徽莊誠壽恭欽獻崇熙皇太后懿旨本年十月予六旬慶辰率土膺歡同深忭祝屆時皇帝率中外臣工詣萬壽山行慶賀禮自大內至頤和園沿途踴躍所經臣民報効點綴景物建設經壇予因康熙乾隆年間歷屆盛典崇隆垂為成憲又值民康物阜海宇乂安不能過為矯情特允皇帝之請在頤和園受賀詔意自六月後倭人鑿毀侵予藩封尋復燬我舟船不得已興師致討刻下干戈未戢征調頻仍兩國生靈均罹鋒鏑每一念及憫悼何窮前因念士卒臨陣之苦特頒內帑三百萬金俾負飽騰茲者慶辰將屆予亦何心侈耳目之觀受臺萊之祝耶所有慶辰典禮著仍在宮中舉行其頤和園受賀事宜卽行停辦欽此朕仰承 慈旨孺懷實有未安惟有再三籲請未蒙 慈允敬維 盛德所關不敢不欽遵宣示各衙門卽遵諭行○諭順天府奏遵查各屬續報被水並現辦情形請飭催原撥銀欸以資接濟一摺本年入夏以來雨水過多順天府屬各河漫溢田禾漸次浸淹民情困苦覽奏實深慮系加恩著撥帑倉米三萬石發交順天府分別災區輕重妥為撥放以惠窮黎至所稱解存戶部兩淮鹽商捐欸十五萬兩著戶部卽行發交又戶部奏准撥歸順屬之湖南漕折銀兩及各省應解備荒經費請飭各該省趕緊籌解之處並著戶部分咨催解餘著照所議辦理○長江水師提督黃翼升卒予祭葬建祠事蹟交國史館立傳賞其子候選道黃宗炎以道員卽選尋予諡武靖○辛未諭張之洞奏湖北漢陽鎮廠於六月初旬

被燒廠屋大排等語鎗廠委員等疏於防範咎有應得所有專司稽查之候選巡檢嚴用炳著卽行革職
總司監工之候選通判馮宇光著降一級調用以示懲儆餘著照所議辦理該衙門知道○諭翰林院編
修黃鐸奏結費有礙捐項請飭變通辦理一摺著該部議奏○壬申電 諭李鴻章現招募各營將到需
械甚急江南廣東兩處或可騰挪著先行電商劉坤一李瀚章酌量分撥若干迅速解津以應急需○癸
酉諭軍機大臣等前在牙山海面廣乙管帶林國祥以孤船奮勁敵戰陣亡奮勇力竭船沈著暫行革職委
署濟遠管帶以觀後效東溝之戰日船傷重鎮遠定遠將士苦戰出力著李鴻章酌保數員以作士氣